

MESYUARAT KEDUA, PENGGAL KEEMPAT
PARLIMEN KEEMPAT BELAS
2021

HARI RABU : 17 NOVEMBER 2021

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 11 HINGGA NO. 42)**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN CHARLES ANTHONY SANTIAGO
[KLANG]**

TARIKH : 17 NOVEMBER 2021 (RABU)

SOALAN

TUAN CHARLES ANTHONY SANTIAGO minta **MENTERI KESIHATAN** menyatakan kesudian kerajaan menubuhkan Dana Kanser Negara bagi membantu pesakit-pesakit dari isi rumah berpendapatan kurang daripada RM5,000. Apakah perkembangan pelan Kementerian untuk membina 'stand-alone' hospital kanser di Sungai Petani. Dan cadangan Kementerian untuk melatih lebih banyak oncologist.

JAWAPAN

Tuan Yang di-Pertua,

1. Berkenaan dana kanser, Kementerian Kesihatan telah menyediakan peruntukan tahunan bagi tujuan rawatan kanser seperti pembedahan, kemoterapi, radioterapi, *brachytherapy*, pemindahan sumsum tulang, terapi hormon, imunoterapi dan ubat *targeted therapy*. Pada tahun 2021, sebanyak RM136.4 juta telah diperuntukkan di bawah aktiviti radioterapi dan onkologi. Sebahagian besar peruntukan telah ini disalurkan kepada Institut Kanser Negara (IKN) dan selebihnya kepada hospital-hospital yang mempunyai perkhidmatan kepakaran rawatan kanser. Di samping itu, sebanyak RM119 juta juga telah disediakan untuk pembelian ubat-ubatan di bawah *Malaysian Patient Assistance Program* (MyPAP).
2. Selain itu, Kementerian Kesihatan juga telah menyediakan Tabung Bantuan Perubatan (TBP) untuk membantu golongan yang kurang

berkemampuan untuk membiayai sebahagian atau sepenuhnya kos rawatan, peralatan perubatan, peralatan rehabilitasi atau ubat-ubatan yang diperlukan, termasuk *implant* bagi pesakit kanser. Usaha ini turut dibantu oleh pihak NGO seperti Majlis Kanser Nasional (MAKNA) dan Yayasan Kanser Tengku Laksamana Johor (khusus untuk pesakit Negeri Johor) yang mana membantu pesakit daripada segi peralatan, ubat-ubatan, kewangan bulanan dan tambang bagi mendapatkan rawatan. Buat masa ini masih belum ada dana bagi rawatan kanser seperti yang dinyatakan.

3. Berhubung dengan *stand-alone* hospital kanser di Sungai Petani, Projek Pusat Kanser Wilayah Utara telah diluluskan oleh Unit Perancang Ekonomi, Jabatan Perdana Menteri (UPE, JPM) untuk dilaksanakan di bawah Rancangan Malaysia Kesebelas, *Rolling Plan* 3 (RP3 RMK11) pada tahun 2018. Walau bagaimanapun, projek ini telah dibatalkan oleh UPE, JPM pada 26 Ogos 2021.

4. Dalam usaha untuk melatih lebih ramai pakar onkologi, Kementerian Kesihatan telah menawarkan dua (2) laluan program kepakaran iaitu Program **Sarjana Kepakaran Perubatan** dengan kerjasama Universiti Awam (UA) di bawah Kementerian Pengajian Tinggi (KPT), di mana pegawai yang layak akan diberi Cuti Belajar Bergaji Penuh (CBBP) dengan Hadiah Latihan Persekutuan (HLP) dan program kepakaran melalui ***Parallel Pathway***.

5. Kementerian Kesihatan bersama UA sentiasa bekerjasama untuk melatih lebih ramai pakar onkologi di mana setiap tahun sebanyak 13 slot bagi bidang onkologi disediakan oleh UA. Pada masa kini seramai 69 pegawai sedang mengikuti program kepakaran onkologi dengan pecahan seramai 49 orang pegawai perubatan sedang mengikuti program kepakaran **Sarjana Perubatan** Onkologi di UA dan seramai 20 orang pegawai mengikuti pengajian kepakaran onkologi secara alternatif di bawah program ***Parallel Pathway***.

6. Untuk makluman juga, penetapan slot adalah bergantung kepada UA untuk melaksanakan latihan kepakaran onkologi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

**DARIPADA : DATO' HAJI AHMAD NAZLAN BIN IDRIS
[JERANTUT]**

TARIKH : 17 NOVEMBER 2021 (RABU)

SOALAN

DATO' HAJI AHMAD NAZLAN BIN IDRIS [JERANTUT] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan kaedah pemantauan dan tindakan yang diambil bagi mengekang kenaikan harga barangan yang dilihat semakin membimbangkan pada ketika ini.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian mengambil maklum akan keresahan masyarakat berikutan isu kenaikan harga barangan yang berlaku. Kenaikan harga atau sebarang perubahan harga yang berlaku adalah sentiasa di dalam perhatian pihak kementerian. Namun kita perlu sedar, tidak semua barangan merupakan barang kawalan yang ditetapkan harganya oleh kerajaan. Perubahan harga barangan dipengaruhi oleh banyak faktor antaranya permintaan dan penawaran, kualiti, kuantiti dan faktor-faktor lain seperti nilai mata wang dan keadaan cuaca. Namun begitu, sekiranya ada berlaku kenaikan yang agak drastik dan didapati ada unsur-unsur pengambilan keuntungan yang berlebihan, tindakan boleh diambil oleh kementerian di bawah Akta Kawalan Harga Dan Antipencatutan 2011.

Sepanjang tahun 2021 sehingga 13 Oktober 2021, sejumlah 738,463 premis perniagaan telah diperiksa di seluruh Negara oleh anggota penguat kuasa KPDNHEP bagi memastikan pematuhan ke atas semua undang-undang yang dikuatkuasakan oleh Kementerian bagi melindungi pengguna. Daripada jumlah tersebut sebanyak 5,947 kertas siasatan telah dibuka di bawah Akta Kawalan Harga Dan Antipencatutan 2011 dengan nilai rampasan dianggarkan berjumlah RM32,480.00 dan nilai kompaun sebanyak RM 929,900.00

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

DARIPADA : YB DATO' NGEH KOO HAM (BERUAS)

TARIKH : 17 NOVEMBER 2021 (RABU)

SOALAN

DATO' NGEH KOO HAM [BERUAS] minta **MENTERI DALAM NEGERI** menyatakan bagaimana sindiket-sindiket penipuan boleh membuka akaun-akaun bank di mana mangsa-mangsa yang tertipu akan membayar wang ke dalam akaun - akaun tersebut dan bagaimana wang tersebut boleh dikeluarkan oleh sindiket-sindiket ini. Nyatakan berapa kes sedemikian telah berlaku untuk 5 tahun yang lepas dan berapakah jumlah penangkapan yang telah berjaya dibuat.

JAWAPAN

Tuan Yang Di Pertua,

Berdasarkan kepada persoalan yang dibangkitkan oleh Yang Berhormat, ia sebenarnya merujuk kepada keadaan yang lebih dikenali sebagai 'keldai akaun' atau *mule account* iaitu tindakan seseorang individu yang membenarkan sindiket menggunakan maklumat perbankan individu tersebut dan individu berkenaan mendapat upah. Sindiket berkenaan akan menggunakan akaun perbankan tersebut untuk pelbagai aktiviti jenayah. Selain itu, pelbagai cara lain yang digunakan sindiket penipuan untuk membuka akaun bank (*mule account*), antaranya:

- a) Menyewa akaun bank milik individu atau entiti bagi digunakan oleh sindiket;

- b) Memperdayakan individu atau entiti untuk menyerahkan maklumat perbankan bagi urusan pinjaman wang atau bagi sesuatu bayaran; dan
- c) Individu atau entiti atas dasar kepercayaan membenarkan penggunaan akaun bank oleh sindiket tanpa mengetahui akaun bank digunakan bagi tujuan penipuan.

Justeru, apabila segala maklumat perbankan telah disimpan oleh sindiket, urusan kemasukan dan pengeluaran wang dapat dilakukan sendiri oleh pihak sindiket.

Jumlah statistik dari tahun 2015 hingga kini berkaitan 'keldai akaun' adalah berdasarkan maklumat diperolehi dari mangsa iaitu berjumlah sebanyak 104,032 'keldai akaun' dengan melibatkan kerugian sekitar RM16.7 juta. Sebanyak 76,901 kes telah diterima oleh Bahagian Siasatan Jenayah Siber & Multimedia (JSJK) dan daripada jumlah kes ini sebanyak 29,124 orang telah ditangkap dan 18,660 orang telah dituduh.

PDRM khususnya JSJK telah menjalankan kerjasama bersama Kementerian Komunikasi dan Multimedia melalui penubuhan Jawatankuasa Teknikal & Induk PDRM dan SKMM. Jawatankuasa Teknikal ini ditubuhkan bagi membincangkan isu-isu siasatan, teknikal dan bantuan antara agensi bagi menangani kes-kes jenayah siber, manakala fungsi Jawatankuasa Induk PDRM dan SKMM adalah untuk membincangkan isu-isu yang melibatkan dasar atau pembuat keputusan melibatkan isu jenayah siber.

Terdapat juga kerjasama di antara PDRM dan syarikat telekomunikasi melalui aplikasi WhatsApp yang dikenali sebagai 'Antispoofing Tech Team' yang bertanggungjawab mengambil tindakan bagi penglibatan isu-isu penyalahgunaan talian telefon dengan lebih pantas.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS TAHUN 2021**

PERTANYAAN : JAWAB LISAN

**DARIPADA : DATO' SRI BUNG MOKTAR BIN RADIN
[KINABATANGAN]**

TARIKH : 17 NOVEMBER 2021 (RABU)

SOALAN

DATO' SRI BUNG MOKTAR BIN RADIN [KINABATANGAN] minta **MENTERI SUMBER MANUSIA** menyatakan perancangan Kementerian dalam mengawal atau mengurangkan bilangan pekerja yang diberhentikan ekoran pandemik COVID19.

JAWAPAN

Tuan Yang Di Pertua,

Kerajaan sedar dan prihatin bahawa impak pandemik COVID-19 adalah serius. Dalam tempoh yang tidak menentu ini, pekerja dan majikan yang terkesan amat memerlukan sokongan dan bantuan.

Bagi membantu majikan-majikan mengekalkan pekerja mereka dan mengawal pengurangan bilangan pekerja yang diberhentikan oleh syarikat, Kerajaan telah memperkenalkan beberapa inisiatif di bawah **Pakej Rangsangan Ekonomi seperti PRIHATIN, PENJANA dan PEMULIH.**

Di bawah pakej tersebut, Program Subsidi Upah (PSU) diperkenalkan untuk membantu majikan mengekalkan pekerja mereka dan Kerajaan telah memperuntukkan **15.3 bilion ringgit untuk melaksanakan PSU 1.0 dan sejumlah 2.4 bilion ringgit bagi PSU 2.0.**

Seterusnya melalui Belanjawan 2021, Kerajaan memperuntukkan **1.5 bilion ringgit bagi pelaksanaan PSU 3.0 selama tiga (3) bulan lagi** secara lebih bersasar, khususnya bagi sektor pelancongan dan peruncitan, dengan kadar RM600 sebulan bagi pekerja bergaji RM4,000 dan ke bawah.

Selain itu, **had 200 pekerja** bagi setiap permohonan ditingkatkan kepada **500 pekerja** bagi syarikat-syarikat besar di bawah sektor pelancongan. PSU 3.0 dijangka dapat membantu kira-kira **70 ribu majikan dan 900 ribu pekerja.**

Bantuan kewangan di bawah PSU telah berjaya mengurangkan jumlah kes kehilangan pekerjaan **pada tahun 2020 iaitu seramai 107,024 orang. Setakat 12 November 2021, hanya mencatatkan 56,523** orang kehilangan pekerjaan. Sekiranya tiada bantuan PSU, pekerja yang akan kehilangan pekerjaan mungkin jauh lebih tinggi seperti yang berlaku di negara-negara lain.

Pakej terbaharu yang diumumkan oleh Kerajaan iaitu **Perlindungan Rakyat Dan Pemulihan Ekonomi (PEMULIH)** merupakan *Road Map* peralihan keluar daripada Perintah Kawalan Pergerakan secara berfasa. Di bawah PEMULIH, Kementerian Sumber Manusia melalui PERKESO melaksanakan beberapa inisiatif untuk tempoh mulai 15 Julai 2021 hingga 31 Disember 2021 seperti berikut:

a) Program Subsidi Upah 4.0

Program ini melibatkan peruntukan sebanyak **RM3.8 bilion dengan lebih 2.5 juta pekerja dijangka menerima manfaat** untuk membantu majikan mengurangkan kos operasi perniagaan. Semua majikan boleh memohon untuk semua pekerja tanpa had gaji tetapi terhad sehingga 500 pekerja.

Kadar subsidi yang dibayar adalah **sebanyak RM600 sebulan** bagi setiap pekerja selama dua (2) bulan untuk semua sektor ekonomi (Fasa 2) dan dua (2) bulan tambahan untuk sektor dalam senarai negatif (Fasa 3).

b) Program Penjana Kerjaya 3.0

Program ini bertujuan menyediakan peluang kerjaya menerusi empat (4) program berikut:

- i. **Malaysianization** yang bertujuan untuk menggalakkan majikan menggantikan pekerja asing dengan pekerja tempatan.
- ii. **Golongan mudah terjejas** yang memberi dorongan kepada majikan untuk membuat pengambilan kategori pekerja berusia 40 tahun ke atas, OKU dan bekas banduan dengan tempoh kontrak penggajian dikurangkan daripada satu (1) tahun kepada enam (6) bulan.
- iii. **Program KerjayaGig** merupakan perluasan insentif pengambilan pekerja meliputi pekerjaan gig atau sementara untuk golongan penganggur tegar **lebih daripada 180 hari**.

Majikan atau Penyedia Platform yang berdaftar dengan PERKESO mendapat **bantuan RM 200** bagi setiap pekerja yang digajikan. Manakala pekerja pula menerima **RM 600 sebulan sehingga tempoh maksimum enam (6) bulan**.

iv. **Insentif Penempatan Pekerjaan oleh Agensi Pekerjaan Swasta (APS)** diberikan secara *one-off* bagi penempatan pekerja berkemahiran rendah. Kadar bayaran insentif adalah seperti berikut:

- RM 300 untuk penempatan pekerja dengan tawaran gaji RM 4,000 dan ke atas
- RM 200 untuk penempatan pekerja dengan tawaran gaji RM 3,000 dan ke atas
- RM 100 untuk penempatan pekerja dengan tawaran gaji RM 3,000 dan ke bawah

c) **Perluasan Elaun Mencari Pekerjaan (EMP)**

Program ini khusus kepada golongan yang tidak dilindungi di bawah Sistem Insurans Pekerjaan iaitu golongan menganggur dan aktif mencari pekerjaan melalui portal MyFutureJobs. Melalui EMP, kumpulan ini layak menerima **elaun RM300 sebulan** jika menghadiri tiga (3) sesi temu duga dalam tempoh 30 hari dan akan turut dibayar **RM400 secara one-off** sekiranya berjaya mendapat pekerjaan pada bulan kedua.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

**DARIPADA : PUAN RUSNAH BINTI ALUAI
[TANGGA BATU]**

TARIKH : 17 NOVEMBER 2021 (RABU)

SOALAN

Minta **MENTERI BELIA DAN SUKAN** menyatakan ke mana dana sebanyak **RM15 Juta** yang diperuntukkan kepada E-sport dalam belanjawan 2021 disalurkan.

JAWAPAN

Tuan Yang di-Pertua,

Untuk makluman Ahli Yang Berhormat, tahun 2020 dan 2021 merupakan tahun yang mencabar untuk Sektor Sukan dan Rekreasi di mana penganjuran kejohanan serta aktiviti sukan tidak dapat dilaksanakan secara meluas disebabkan pelaksanaan Perintah Kawalan Pergerakan (PKP) dan Pelan Pemulihan Negara (PPN) di seluruh negara akibat penularan wabak pandemik Covid-19.

Namun begitu, selari dengan **Blueprint Esport** yang telah dilancarkan pada tahun 2019, Kementerian telah memberikan penekanan kepada pembangunan atlet, pengurusan persatuan, penganjuran pertandingan dan kemudahan infrastuktur tetap diteruskan.

Beberapa **Program Sukan Esports** telahpun berjaya dilaksanakan secara atas talian untuk memastikan sukan ini terus mendapat perhatian masyarakat serta menyahut usaha kerajaan untuk mematuhi arahan Perintah Kawalan Pergerakan (PKP) bagi kekal berada di rumah. Antara program-program yang telah dilaksanakan dan dalam perancangan adalah seperti berikut:

- a) Kejohanan Esports Peringkat Negeri;
- b) Kejohanan MyBorneo Eforce Invitation 2.0 dengan penglibatan peserta dari pelbagai peringkat umur dan luar negara;
- c) Program MyEsport Hari Sukan Negara 2021
- d) Malaysia Esport League 2021 (MEL21)
- e) ESI Challenge (4 program)
- f) Esports Science with ISN
- g) National *Esport Regulatory Guideline Advocacy*

Esport Integrated (ESI) Hub yang akan menjadi pusat utama pembangunan Esport negara telah ditubuhkan di Puchong, Selangor.

Pusat ini dilengkapi dengan kemudahan esport dan boleh digunakan untuk penganjuran kejohanan, kempen kesedaran, pusat latihan atlet pro, pusat latihan streaming, bengkel esport dan sebagainya. Majlis Sukan Negara juga telah menubuhkan Studio Esport di Bukit Jalil, Kuala Lumpur bagi atlet-atlet menjalani latihan sepenuh masa bagi menyertai kejohanan dan temasya antarabangsa. Selain itu, Studio Esports di semua negeri juga ditubuhkan sebagai platform bagi latihan dan penganjuran kejohanan di peringkat negeri.

Program Persediaan Latihan Atlet Sukan Esports ke temasya Sukan SEA Hanoi 2022 dan Sukan Asia Hangzhou 2022 turut menjadi keutamaan Kementerian menerusi Majlis Sukan Negara. Proses pemilihan dan persediaan atlet menjadi keutamaan bagi memastikan atlet-atlet Esports negara dapat membantu dalam meraih pingat di temasya-temasya tersebut.

Selain itu, Kementerian juga telah mengambil inisiatif untuk mewujudkan **persekitaran digital** yang kompetitif dan mewujudkan ekosistem Esport yang mampan dengan menaiktaraf Studio Esport di peringkat Negeri. Manakala bagi melahirkan pemain Esport yang bertanggungjawab dan beretika, program pengukuhan undang-undang dan tadbir urus yang baik juga telah diperkenalkan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

DARIPADA : YB TUAN ANYI NGAU (BARAM)

TARIKH : 17 NOVEMBER 2021 (RABU)

SOALAN

TUAN ANYI NGAU [BARAM] minta **MENTERI DALAM NEGERI** menyatakan rancangan berkenaan :-

(a) balai / pondok polis di Pekan Beluru, Pekan Long Lama dan Bario; dan

(b) permohonan agar IPD dibina di Pekan Long Lama dan Pekan Beluru sebagai Pusat Pentadbiran Peringkat Daerah yang dinaik taraf 5 tahun lepas.

JAWAPAN

Tuan Yang Di Pertua,

Kerajaan sentiasa prihatin mengenai prasarana setiap agensi di bawah Kementerian Dalam Negeri (KDN), termasuklah yang melibatkan Polis Diraja Malaysia (PDRM). Kementerian Dalam Negeri (KDN) mengambil perhatian mengenai tiga balai polis di Parlimen Baram iaitu Balai Polis Beluru, Balai Polis Long Lama dan Balai Polis Bario. Pada masa ini, ketiga-tiga balai polis terbabit terletak di bawah pentadbiran Ibu Pejabat Polis Daerah (IPD) Marudi.

Untuk makluman Yang Berhormat perancangan bagi pembangunan sesebuah projek di bawah Kementerian Dalam Negeri, termasuk baik pulih balai dan pondok polis adalah ditentukan berdasarkan prioriti dan kriteria-kriteria keutamaan mengikut kemampuan kewangan Kerajaan. Dalam hal ini, keperluan pembangunan atau naik taraf balai polis ini akan dikaji mengikut keutamaan bagi dipertimbangkan di dalam *Rolling Plan* (RP) 3, Rancangan Malaysia (RMK) Ke-12 Tahun 2023.

Manakala perkara berkaitan permohonan untuk membina IPD di Beluru dan Long Lama akan diteliti dengan sewajarnya oleh pihak PDRM dan KDN kerana ia melibatkan pengwujudan perjawatan baharu, pembinaan prasarana baharu dan keperluan kewangan untuk menampung operasi IPD berkenaan. Selain itu, pertimbangan daripada agensi lain seperti Jabatan Perkhidmatan Awam (JPA), Kementerian Kewangan (MOF) dan Unit Perancang Ekonomi (EPU), Jabatan Perdana Menteri (JPM) adalah diperlukan dalam meneliti cadangan tersebut.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS (2021)**

PERTANYAAN : LISAN

**DARIPADA : PUAN HAJAH NATRAH BINTI ISMAIL
[SEKIJANG]**

TARIKH : 17 NOVEMBER 2021 (RABU)

SOALAN

PUAN HAJAH NATRAH BINTI ISMAIL [SEKIJANG] minta **MENTERI PERUMAHAN DAN KERAJAAN TEMPATAN** menyatakan statistik terkini pusat perjudian, kelab malam dan pusat urut yang berlesen di seluruh negara dan apakah usaha Kementerian dalam memastikan pematuhan operasi pusat-pusat ini agar lesen yang diberikan tidak disalah guna bagi tujuan jenayah.

JAWAPAN

Tuan Yang di-Pertua,

Untuk makluman Ahli Yang Berhormat, sehingga 30 September 2021 terdapat 809 buah pusat perjudian, 2,678 buah kelab malam dan 3,114 buah pusat urut dan spa yang berlesen di seluruh negara.

Kelulusan lesen/ permit Operator Perjudian sesebuah Pusat Perjudian adalah tertakluk kepada Akta Rumah Judi Terbuka 1953 [Akta 289], Akta Pertaruhan 1953 [Akta 495], Akta Pertaruhan Pool 1967 [Akta 384] dan Akta Loteri 1952 [Akta 288] yang terletak di bawah bidang kuasa Kementerian Kewangan Malaysia dan Polis Diraja Malaysia (PDRM). Kementerian Perumahan dan Kerajaan Tempatan (KPKT) melalui Pihak Berkuasa Tempatan (PBT) hanya mengeluarkan lesen premis perniagaan di bawah Undang-undang Kecil Tred, Perniagaan dan Perindustrian selepas permohonan lesen judi, lesen kelab malam serta aktiviti hiburan mendapat kelulusan lesen / permit operasi.

Untuk makluman Ahli Yang Berhormat juga, antara langkah penguatkuasaan yang dilaksanakan oleh PBT terhadap pusat-pusat perjudian, kelab malam dan rumah urut adalah seperti berikut:

- (a) PBT bekerjasama dengan Polis DiRaja Malaysia (PDRM) dan Jabatan Kastam DiRaja Malaysia (JKDM) dalam menjalankan penguatkuasaan secara bersepadu. Sebagai contoh, operasi bersepadu antara PDRM dan PBT yang dikenali sebagai Ops Dadu bagi membanteras judi haram, Ops Noda Khas ke atas pusat-pusat hiburan yang menjual minuman beralkohol serta Ops Gegar dan Ops Noda ke atas rumah urut yang beroperasi secara haram; dan
- (b) melaksanakan tindakan penguatkuasaan melibatkan risikan, serbuan, tangkapan di premis dan pendakwaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' HAJI CHE ABDULLAH BIN MAT NAWI
[TUMPAT]**

TARIKH : 17 NOVEMBER 2021 (RABU)

SOALAN

DATO' HAJI CHE ABDULLAH BIN MAT NAWI minta **MENTERI PEMBANGUNAN LUAR BANDAR** menyatakan rancangan pembinaan sebuah jambatan menghubungkan Pulau Teluk Renjuna yang menjadi keperluan kepada penduduk setempat untuk menyeberang ke tanah besar.

JAWAPAN

Tuan Yang Dipertua,

Untuk makluman Yang Berhormat, pihak Kementerian mengambil maklum akan keperluan pembinaan jambatan bagi menghubungkan kawasan pulau di Teluk Renjuna ke Bandar Tumpat.

Sehubungan itu, pihak Kementerian bersama pihak Jabatan Kerja Raya (JKR) Negeri Kelantan telah mengadakan satu lawatan teknikal ke kawasan Teluk Renjuna pada 6 Oktober 2021 bagi menentukan skop dan anggaran kos pembinaan jambatan berkenaan.

Seterusnya, pihak JKR Daerah dan Negeri akan menyediakan Brif Projek yang mengandungi cadangan skop dan anggaran kos projek sebelum ianya dapat diangkat untuk dimasukkan di dalam Senarai Keutamaan Kerajaan Negeri bagi permohonan projek baharu melalui Kementerian ini di bawah Rolling Plan Ke-3, Rancangan Malaysia ke-12.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

DARIPADA : TUAN CHONG CHIENG JEN [STAMPIN]

TARIKH : 17 NOVEMBER 2021 (RABU)

SOALAN

TUAN CHONG CHIENG JEN [STAMPIN] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan adakah Kementerian melanjutkan polisi Kerajaan PH yang membenarkan pengeluaran makanan dan minuman di Sabah dan Sarawak untuk mengimpot gula bertapis. Berapa pengeluaran itu telah diberi kelulusan permit mengimpot gula bertapis di tahun 2021 dan 2022.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian buat masa ini masih meneruskan polisi pengimportan gula putih bertapis kepada semua pengeluar makanan dan minuman (F&B) dan syarikat pemborong gula tempatan. Semua syarikat yang berminat untuk memohon permit mengimport gula putih bertapis ini boleh memohon secara bertulis dengan mengemukakan dokumen yang lengkap kepada Kementerian, pada bila-bila masa sepanjang tahun. Hanya permohonan yang lengkap dan memenuhi syarat sahaja yang akan dipertimbangkan.

Untuk Tahun 2021, tiada syarikat F&B dari Sabah dan Sarawak yang diluluskan permit mengimport gula putih bertapis kerana permohonan yang dikemukakan adalah tidak lengkap atau tidak memenuhi kriteria pertimbangan. Walau bagaimanapun, terdapat dua syarikat pemborong dari yang diluluskan permit mengimport gula bertapis pada tahun 2021 yang mana kelulusan AP berkenaan adalah berkuatkuasa sehingga 31 Disember 2021 dan 15 Mei 2022.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB TUAN LUKANISMAN BIN AWANG SAUNI
(SIBUTI)**

TARIKH : 17 NOVEMBER 2021 (RABU)

SOALAN

TUAN LUKANISMAN BIN AWANG SAUNI [SIBUTI] minta **MENTERI DALAM NEGERI** menyatakan berapa jumlah terkini banduan yang dibebaskan melalui sistem pemulihan pembebasan bersyarat (*parole system*) dan apakah sasaran Kerajaan untuk mengurangkan kesesakan penjara di seluruh Malaysia.

JAWAPAN

Tuan Yang Di Pertua,

Untuk makluman Ahli Yang Berhormat, statistik pelepasan banduan melalui Perintah Parol dari tahun 2008 sehingga Oktober 2021 adalah seramai **43,247 Orang DiParol (ODP)**. Bagi pelaksanaan pelepasan bersyarat iaitu melalui Pelepasan Banduan Secara Berlesen (PBSL) untuk banduan hukuman bawah 1 tahun adalah seramai **2,306 orang banduan**. Program ini dimulakan mulai Oktober 2020 sehingga kini.

Jumlah semasa keseluruhan banduan pada 10 Oktober 2021 yang sedang menjalani Pemulihan Dalam Komuniti (PDK) atau pemulihan di luar tembok penjara adalah seramai **4,395 orang banduan**, yang terlibat dalam program Parol, Perintah Kehadiran Wajib (PKW), Program Reintegrasi Penghuni Industri, Program Reintegrasi Penghuni dan program *Corporate Smart Internship*. Sasaran akan terus dipertingkatkan kepada 8,000 banduan yang dijangka akan mengikuti PDK pada tahun 2022, bagi tujuan mengurangkan kesesakan dalam penjara.

Jabatan Penjara Malaysia melalui Kementerian Dalam Negeri telah mengambil beberapa strategi dan tindakan bagi mengurangkan kesesakan seluruh institusi penjara. Antaranya adalah:

- i. Jabatan Penjara Malaysia dengan sokongan Kementerian Dalam Negeri telah mewujudkan beberapa penjara sementara. Sebanyak 10 bekas kem Pusat Latihan Khidmat Negara (PLKN) telah diwartakan di bawah Seksyen 3, Akta Penjara 1995 sebagai Penjara Satelit (PS), untuk penempatan banduan yang baru bagi tujuan pengasingan sebelum dimasukkan ke penjara.
- ii. Selain itu, Jabatan Penjara Malaysia turut mewujudkan Pusat Transit Penerimaan (PTP) di institusi penjara bagi mengurangkan tahap kebolehjangkitan COVID-19 dalam kalangan banduan serta mengurangkan kesesakan, untuk menempatkan banduan sabitan dan reman kategori risiko keselamatan minima dengan mengambilkira

keperluan pengasingan berdasarkan tarikh-tarikh kemasukan;

- iii. Selaras dengan halatuju Jabatan Penjara Malaysia iaitu 2/3 banduan sabitan yang layak akan menjalani pemulihan di luar penjara, langkah-langkah mengurangkan kesesakan melalui pelaksanaan dan pemerkasaan Sistem Parol, Perintah Kehadiran Wajib, Program Reintegrasi Penghuni Industri, Program *Corporate Smart Internship* dan Pelepasan Banduan Secara Lesen, dilaksanakan secara berterusan;
- iv. Selain itu, Rang Undang-Undang (Kehadiran Wajib Pesalah-Pesalah)(Pindaan) 2021 ("RUU PKW") juga telah disediakan dan sedang dalam penelitian Jabatan Peguam Negara. RUU tersebut bertujuan untuk meminda Akta Kehadiran Wajib Pesalah-Pesalah 1954 [Akta 461] dan menggantikan Ordinan Darurat (Kehadiran Wajib Pesalah-Pesalah)(Pindaan) 2021 ("ODPKW") sebagai satu lagi usaha memperkasa inisiatif pemenjaraan di luar tembok penjara melalui program pemulihan pesalah di dalam komuniti. Inisiatif ini membolehkan pesalah yang dihukum dengan hukuman 1 tahun ke bawah boleh dipertimbangkan dalam program berkenaan; dan
- v. Pada masa yang sama, cadangan *Probation & Community Correction* yang melibatkan pelbagai alternatif kepada hukuman pemenjaraan sedang dikaji oleh pihak-pihak yang berkaitan dengan perundangan;

Kementerian Dalam Negeri dan Jabatan Penjara Malaysia bersama-sama dengan Agensi kerajaan lain yang berkaitan, akan sentiasa bekerjasama dalam memastikan inisiatif-inisiatif dalam menangani masalah kesesakan di penjara ini, terus dilaksanakan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : PUAN VIVIAN WONG SHIR YEE
[SANDAKAN]**

TARIKH : 17 NOVEMBER 2021 (RABU)

SOALAN

PUAN VIVIAN WONG SHIR YEE [SANDAKAN] minta **MENTERI KESIHATAN** menyatakan berkenaan sijil vaksinasi kita diperakui oleh berapa banyak negara lain pada masa ini. Adakah Kerajaan kita mempunyai persetujuan bersama dengan negara-negara ini untuk membenarkan rakyat Malaysia yang telah diberi vaksin sepenuhnya untuk mengunjungi negara mereka tanpa syarat atau keperluan kuarantin.

JAWAPAN

Tuan Yang di-Pertua,

1. Pematuhan sijil vaksinasi digital COVID-19 negara kepada piawaian antarabangsa sebagaimana yang digariskan oleh pihak Pertubuhan Kesihatan Sedunia (WHO) telah memudahkan rundingan pengiktirafan sijil vaksinasi COVID-19 dengan negara asing sebagai persediaan pembukaan sempadan. Setakat ini, Malaysia telah mengadakan rundingan dengan beberapa buah negara seperti Singapura, Republik Rakyat China dan Kesatuan Eropah. Sehingga kini, rundingan yang telah dimuktamadkan adalah dengan Singapura.

2. Selain daripada Kementerian Kesihatan, Kerajaan Malaysia melalui Kementerian Sains, Teknologi dan Inovasi (MOSTI) serta Kementerian Luar Negeri (KLN) juga telah menerima banyak permohonan secara terasing melalui pelbagai saluran daripada negara asing untuk mengiktiraf sijil vaksinasi COVID-19 yang dikeluarkan oleh negara masing-masing bagi tujuan memudahkan pergerakan warga mereka memasuki Malaysia.

3. Sehubungan itu, Kementerian Kesihatan, MOSTI dan KLN pada ketika ini sedang dalam peringkat akhir penyediaan kertas Memorandum Jemaah Menteri mengenai pengiktirafan sijil vaksinasi COVID-19 yang dikeluarkan oleh Kementerian Kesihatan sebagai sijil rasmi COVID-19 Kerajaan Malaysia bagi tujuan pertukaran pengiktirafan dengan negara luar agar proses tersebut dapat dilaksanakan dengan lebih teratur melalui saluran diplomasi di bawah KLN dan diikuti dengan rundingan teknikal oleh MOSTI. Pengiktirafan sijil vaksinasi COVID-19 antara Malaysia dengan negara asing adalah penting untuk dilaksanakan bagi memberi akses kepada kesinambungan aktiviti ekonomi antara negara, memudahkan proses masuk dan keluar dari sempadan negara dan pada masa yang sama memastikan kawalan kesihatan awam dan keselamatan warga di negara-negara terlibat tetap terjaga.

4. Tidak dinafikan, Malaysia harus turut mengambil peluang untuk mempromosikan sijil vaksinasi digital COVID-19 negara kepada negara asing dan seterusnya mendapatkan pengiktirafan secara timbal balas atau sehalu (*unilateral*) melalui pejabat kedutaan dan Pejabat Perwakilan Malaysia (MALAWAKIL) bagi kemudahan pergerakan rakyat Malaysia di negara luar.

5. Untuk makluman, perbincangan dan rundingan dua hala pengiktirafan sijil vaksinasi dengan negara asing akan melibatkan dua (2) komponen utama, iaitu:

- (i) kawalan dan prosedur kesihatan awam yang perlu dipatuhi bagi tujuan rentas sempadan negara yang berada di bawah bidang kuasa Kementerian Kesihatan; dan
- (ii) perbincangan teknikal spesifikasi sijil vaksinasi yang diterajui oleh Kementerian Sains, Teknologi dan Inovasi (MOSTI).

6. Walaupun tanpa persetujuan bersama, dua buah negara luar telah sedia memberikan kelonggaran kepada pengembara yang tiba dari Malaysia iaitu:

- (i) **United Kingdom:** Tiada keperluan untuk menjalani tempoh kuarantin wajib bagi pengembara yang tiba dari Malaysia

dengan mempunyai bukti telah menerima vaksin COVID-19 (terhad kepada vaksin Pfizer BioNTech dan Astrazeneca) yang lengkap 14 hari sebelum tarikh ketibaan. Mereka sekadar perlu menjalani ujian pengesanan COVID-19 pada atau sebelum hari kedua selepas tiba di negara tersebut;

- (ii) **Amerika Syarikat:** Tiada keperluan untuk menjalani tempoh kuarantin wajib bagi pengembara yang tiba dari Malaysia dengan mempunyai bukti telah menerima vaksin COVID-19 yang lengkap 14 hari sebelum tarikh ketibaan. Mereka sekadar perlu menjalani ujian pengesanan COVID-19 dalam masa 3 hari sebelum berlepas ke Amerika Syarikat, dan seterusnya sekali lagi sekitar hari ketiga sehingga hari kelima selepas tiba di negara tersebut. Begitu juga, mereka perlu menjalankan pemantauan kesihatan sendiri selepas tiba dan sekiranya bergejala, untuk segera menjalankan ujian COVID-19 serta mengasingkan diri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA,PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI BUNG MOKTAR BIN RADIN
[KINABATANGAN]**

TARIKH : 17 NOVEMBER 2021 (RABU)

SOALAN

minta **MENTERI PEMBANGUNAN USAHAWAN DAN KOPERASI** menyatakan apakah usaha Kementerian dalam memastikan para peniaga kecil sederhana mampu berhadapan dengan cabaran perniagaan di kala pandemik COVID-19 dan apakah statistik perniagaan yang telah “gulung tikar” ekoran terkesan dengan pandemik COVID-19.

JAWAPAN

Tuan Yang di-Pertua,

1. Kementerian Pembangunan Usahawan dan Koperasi (MEDAC) komited dalam membantu Perusahaan Mikro, Kecil dan Sederhana (PMKS) untuk mendepani cabaran perniagaan kesan pandemik Covid-19.
2. Bagi tujuan tersebut, MEDAC telah menyediakan bantuan bagi memulihkan usahawan dan koperasi terjejas melalui skim pembiayaan dan pemberian moratorium merangkumi 26 program dengan implikasi kewangan sebanyak RM7.06 billion dan melibatkan 192,541 penerima manfaat.
3. Selain itu, MEDAC juga melaksanakan program yang berteraskan adaptasi teknologi bagi memperkukuhkan daya tahan PMKS yang merangkumi pelaksanaan 11 program dengan peruntukan sebanyak RM14.8 juta dan melibatkan 8,950 penerima manfaat.
4. Berdasarkan Kaji Selidik Ke Atas Usahawan semasa Perintah Kawalan Pergerakan 3.0 (PKP3.0), yang telah dilaksanakan oleh MEDAC pada 15 hingga 28 Jun 2021 mendapati bahawa sebanyak 3.16% atau sebanyak 37,415 usahawan telah berhenti beroperasi atau gulung tikar. Majoritinya adalah usahawan mikro iaitu sebanyak 26,007 dan diikuti dengan PKS sebanyak 2,738.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI DR. HAJI DZULKEFLY
BIN AHMAD [KUALA SELANGOR]**

TARIKH : 17 NOVEMBER 2021 (RABU)

SOALAN

DATUK SERI DR. HAJI DZULKEFLY BIN AHMAD minta **MENTERI KESIHATAN** menyatakan persediaan untuk memasuki Fasa Endemik.

JAWAPAN

Tuan Yang di-Pertua,

1. Status endemik COVID-19 sesebuah negara hanya akan ditentukan oleh Pertubuhan Kesihatan Sedunia (WHO). Walau bagaimanapun, sesebuah negara termasuk Malaysia boleh menentukan tahap penularan jangkitan COVID-19 pada fasa endemik berdasarkan pencapaian nilai ambang yang ditetapkan dan disesuaikan dengan kapasiti respon sesebuah negara (*acceptable number*) agar tidak menjadi masalah kepada kesihatan awam. Pada fasa endemik ini, jumlah kes harian masih boleh meningkat walaupun liputan vaksinasi COVID-19 telahpun melebihi 70%. Namun, pada fasa ini akan dapat dilihat pengurangan bilangan kes yang memerlukan kemasukan ke hospital dan kematian yang disebabkan oleh COVID-19.

2. Kerajaan, khususnya Kementerian Kesihatan telah merangka tindakan-tindakan untuk memasuki fasa endemik seperti berikut:

- (i) terus mengekang penularan hingga ke tahap endemik;
- (ii) meningkatkan kesiapsiagaan untuk menghadapi ancaman

daripada kemunculan varian baharu dan peningkatan kes; dan

- (iii) meningkatkan penglibatan pelbagai pihak dan lebih telus dalam perkongsian maklumat dengan masyarakat agar saranan serta informasi dari Kerajaan dapat diterima dan dilaksanakan.

Tuan Yang di-Pertua,

3. Kementerian Kesihatan juga telah menggariskan lima (5) strategi utama untuk transisi kepada fasa endemik. Ia merangkumi:

(i) Respon Kesihatan Awam dan Vaksinasi

Respon kesihatan awam termasuk pengesanan awal kes melalui pengujian, siasatan dan seterusnya memberi rawatan serta isolasi kes tersebut. Kontak rapat perlu dikenal pasti dengan cepat dan dikuarantin supaya dapat memutuskan penularan jangkitan. Ini yang dimaksudkan di bawah strategi "*Find, Test, Trace, Isolate and Support*". Vaksinasi juga adalah penting dalam memastikan kes-kes teruk dapat dicegah dan seterusnya mengurangkan kes yang memerlukan dimasukkan ke hospital serta kematian disebabkan oleh jangkitan COVID-19.

(ii) Pengujian dan Survelan

Pengujian dan surveilan dilaksanakan secara berterusan dalam mengenalpasti varian baharu dalam komuniti dan seterusnya tindakan sewajarnya dapat dilaksanakan. Survelan ini termasuklah surveilan *influenza-like illness* (ILI), surveilan *severe acute respiratory infection* (SARI) dan surveilan genomik virus SARS-CoV-2. Survelan persekitaran juga dijalankan di kawasan prevalen kes COVID-19 yang rendah.

(ii) Pengurusan Kes COVID-19

- (a) Penjagaan Kesihatan Primer diperkukuhkan: Penyampaian perkhidmatan secara maya/ atas talian atau hibrid

dikembangkan dan diperluaskan kepada lain-lain perkhidmatan seperti penyakit tidak berjangkit (NCD) dan kesihatan ibu & anak (MCH). Manakala sistem janji temu dalam talian diperluaskan dan Pusat Penilaian COVID-19 maya (*Virtual CAC*) bagi penilaian status kesihatan kes COVID-19 diteruskan dan diperluaskan ke negeri-negeri lain. Penglibatan pengamal perubatan swasta dipertingkatkan dalam pengurusan COVID-19.

- (b) Pengurusan kes di hospital dimantapkan: Memperkukuhkan operasi gabungan antara Pusat Panggilan Kecemasan Perubatan (MECC) dan Unit Pengurusan Katil (BMU) dengan pengenalan lebih awal status kes semasa pesakit diambil. Pesakit yang diambil oleh ambulan terutamanya kes ILI dan SARI perlu disaring menggunakan ujian kit pantas RTK antigen (Ag) air liur. *Triage* penyakit berjangkit yang efektif dilaksanakan di Jabatan Kecemasan dan Trauma. Saringan ujian COVID-19 pra-kemasukan ke hospital diteruskan.

(iv) Pemerkasaan Komuniti

Pemerkasaan individu, komuniti dan majikan dalam menangani COVID-19 adalah sangat penting. Individu dan Komuniti menjadi ejen perubahan termasuk penglibatan organisasi bukan Kerajaan (NGO) dan organisasi berasaskan komuniti (CBO). Masyarakat digalakkan untuk menjalani saringan kesihatan mental secara sendiri melalui Aplikasi MySejahtera untuk pengesanan awal penyakit kemurungan (*depression*) dan keresahan (*anxiety*). Bantuan Psikososial akan diberikan semasa pasca COVID-19 oleh sukarelawan terlatih. Pemerkasaan ketua komuniti setempat ditingkatkan dalam mengenal pasti, memberi sokongan dan merujuk mengikut keperluan penduduk setempat. Promosi dan advokasi terhadap penyakit tidak berjangkit juga dijalankan seiring dengan pemerkasaan komuniti ini.

(v) Kawalan Sempadan

Prosedur operasi standard (SOP) dan dasar kuarantin dikaji berdasarkan situasi COVID-19 dalam negara dan di peringkat global. “*Test and Release*” strategi bagi perjalanan antarabangsa melibatkan pengembara antarabangsa yang tiba di Malaysia dengan pengurangan tempoh kuarantin wajib jika didapati ujian COVID-19 negatif. Penilaian risiko dilakukan ke atas pengembara dengan sejarah perjalanan antarabangsa dan masuk ke Malaysia.

Ia dibuat berdasarkan berdasarkan kriteria ditetapkan termasuk kewujudan varian baharu serta liputan vaksinasi di negara yang dikunjungi atau negara asal pengembara dan dikategorikan sebagai merah dan hijau sebagai syarat pemberian kelonggaran ke atas perintah kuarantin.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS, TAHUN 2021**

PERTANYAAN : JAWAB LISAN

**DARIPADA : DATO' MOHD. NIZAR BIN HAJI ZAKARIA
[PARIT]**

TARIKH : 17 NOVEMBER 2021 (RABU)

SOALAN

DATO' MOHD. NIZAR BIN HAJI ZAKARIA [PARIT] minta **MENTERI
SUMBER MANUSIA** menyatakan :

- (a) berapa jumlah belia yang telah diserap masuk bekerja secara tetap setelah tamat menjalani Program Perantisan Di Bawah Penjanakerjaya Pertubuhan Keselamatan Sosial (PERKESO) ; dan
- (b) adakah inisiatif program penjana kerjaya ini dapat membantu mengurangkan jumlah pengangguran di Malaysia

JAWAPAN

Tuan Yang Di Pertua,

Sehingga 8 Oktober 2021 Program Perantisan PenjanaKerjaya di bawah Pertubuhan Keselamatan Sosial (PERKESO) telah berjaya menempatkan seramai 33,017 orang belia. Walau bagaimanapun bilangan belia yang diserap bekerja secara tetap setelah tamat menjalani Program Perantisan ini masih belum dimuktamadkan. PERKESO akan mengemukakan maklumat tersebut setelah pengumpulan data daripada agensi-agensi yang berkaitan selesai.

Bagi menjawab soalan kedua, Inisiatif Program PenjanaKerjaya ternyata membantu golongan sasaran di mana ianya meningkatkan penawaran peluang pekerjaan daripada majikan kepada pencari kerja. Selain itu, pencari kerja yang mendapat pekerjaan melalui inisiatif ini juga boleh menjalani latihan untuk meningkatkan kemahiran mereka di dalam pekerjaan baharu mereka.

Secara keseluruhannya, bagi tempoh Jun 2020 sehingga 8 Oktober 2021, program PenjanaKerjaya telah membantu seramai 316,521 orang pencari kerja.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : PUAN VIVIAN WONG SHIR YEE [SANDAKAN]

TARIKH : 17 NOVEMBER 2021 (RABU)

SOALAN

PUAN VIVIAN WONG SHIR YEE minta **MENTERI KESIHATAN** menyatakan berapa ramai pesakit bukan COVID-19 yang berkaitan pembedahan telah ditunda di Hospital Duchess of Kent, Sandakan sejak Mac 2020 akibat pandemik dan apakah yang dilakukan Kementerian untuk menyelesaikan hal yang tertunggak ini.

JAWAPAN

Tuan Yang di-Pertua,

1. Mengikut rekod, bilangan kes pembedahan elektif major (bukan kecemasan) yang tertunda (pelbagai disiplin) di Hospital Duchess of Kent, Sandakan setakat 1 November 2021 adalah sebanyak 406 kes. Walau bagaimanapun, dengan keberkesanan program vaksinasi COVID-19 di Sabah, khususnya di Sandakan telah melihatkan penurunan kes COVID-19 serius yang memerlukan rawatan di hospital dan seterusnya telah membolehkan pesakit-pesakit dijadualkan semula untuk rawatan pembedahan elektif in-house bermula 1 November 2021 secara berperingkat.

2. Kementerian Kesihatan telah melaksanakan pelbagai tindakan untuk menyelesaikan isu rawatan tertunggak di fasiliti-fasiliti kementerian termasuk Hospital Duchess of Kent, Sandakan, antaranya ialah:

- (i) memperluas **penyumberluaran perkhidmatan perubatan (pesakit bukan COVID-19) kepada pihak hospital swasta** bagi menangani isu rawatan tertunggak. Bagi tahun 2020, sebanyak 19 kes pembedahan elektif major telah dilaksanakan secara penyumberluaran, manakala untuk tahun 2021 pula, sebanyak 16 kes pembedahan elektif major telah berjaya dilaksanakan dan 11 kes lagi sedang dalam proses rujukan ke fasiliti perubatan swasta; dan
- (ii) pelaksanaan **Program Pembedahan Elektif Pada Hari Sabtu** kepada semua hospital berpakar Kementerian Kesihatan di Sabah agar fasiliti dewan bedah sedia ada dapat digunakan secara optimumnya bagi menyelesaikan semua tunggakan kes elektif dan meningkatkan '*Operating Hours*'.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN SHAHARIZUKIRNAIN BIN ABD.
KADIR [SETIU]**

TARIKH : 17 NOVEMBER 2021 (RABU)

SOALAN

TUAN SHAHARIZUKIRNAIN BIN ABD. KADIR minta **MENTERI KESIHATAN** menyatakan usaha pihak Kementerian dalam mengekang isu penjualan produk Ivermectin yang tidak berdaftar namun digunakan sebagai rawatan atau pencegahan COVID-19.

JAWAPAN

Tuan Yang di-Pertua,

1. Kementerian Kesihatan melalui Bahagian Penguatkuasaan Farmasi sentiasa menjalankan pemantauan dan penguatkuasaan bagi memastikan produk-produk kesihatan dan ubat-ubatan yang dipasarkan di Malaysia berdaftar dengan Pihak Berkuasa Kawalan Dadah (PBKD) sebelum dijual kepada orang awam. Produk kesihatan yang berdaftar mempunyai nombor pendaftaran MAL serta pelekat keselamatan hologram pada labelnya.

2. Bagi mengekang penjualan produk kesihatan tidak berdaftar termasuk produk dengan dakwaan boleh merawat COVID-19 seperti Ivermectin, Kementerian Kesihatan telah menjalankan tindakan pemeriksaan dan operasi serbuan secara berterusan ke atas premis-premis atau penjual berkaitan berdasarkan pemantauan dalaman dan pengesahan ke atas aduan yang diterima daripada orang awam. Syarikat atau individu yang didapati memiliki atau menjual produk kesihatan, tidak

berdaftar akan disiasat dan didakwa di mahkamah di bawah Akta Jualan Dadah 1952.

3. Kementerian Kesihatan telah menerima sebanyak 183 aduan dan 81 maklumat mengenai Ivermectin sepanjang tahun 2020 hingga 12 Oktober 2021. Berdasarkan pengesahan yang dijalankan, sebanyak **17 premis** telah diserbu pada tahun 2020 dengan nilai rampasan berjumlah **RM7,193** dan serbuan ke atas **43 premis serta 17 pemeriksaan** pada tahun 2021 dengan nilai rampasan **RM124,815**.

4. Kementerian Kesihatan juga telah meningkatkan pemantauan dan tindakan penguatkuasaan melibatkan pengiklanan dan penjualan Ivermectin secara dalam talian. Terdapat pengiklanan dan penjualan keluaran Ivermectin di platform e-dagang yang dijual telah diarah untuk diturunkan dan sejak tahun 2020, pihak syarikat pengendali platform telah diarahkan untuk menyekat sebarang produk ubat-ubatan berkaitan COVID-19.

5. Sebanyak **2,891 iklan produk** yang mengandungi tuntutan berkaitan COVID-19 telah dinotifikasi untuk diturunkan sejak tahun 2020 sehingga 12 Oktober 2021, iaitu termasuk:

- (i) 247 iklan berkaitan Ivermectin yang diarahkan untuk diturunkan di platform e-dagang dalam negara;
- (ii) 63 bilangan pautan di sosial media dan platform e-dagang luar negara berkaitan Ivermectin telah dimajukan kepada pentadbir platform bagi permohonan penurunan kandungan; dan
- (iii) 9 laman web (*website*) telah dimajukan kepada Suruhanjaya Komunikasi dan Multimedia Malaysia (SKMM) untuk tindakan sekatan.

6. Kementerian Kesihatan secara berterusan mengadakan sesi libat urus bersama sosial media dan membekalkan kata-kata kunci berkaitan supaya pengiklanan oleh pengguna sosial media boleh disekat dengan mudah sebelum ianya berlaku.

Sekian, terima kasih.

PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPATBELAS

PERTANYAAN : JAWAB LISAN

DARIPADA : TUAN OSCAR LING CHAI YEW [SIBU]

TARIKH : 17 NOVEMBER 2021 (RABU)

SOALAN

TUAN OSCAR LING CHAI YEW [SIBU] minta **MENTERI DALAM NEGERI** menyatakan perkembangan terkini rancangan untuk memasang *body camera* ke atas setiap anggota polis yang menjalankan tugas. Nyatakan kos yang terlibat setakat ini.

JAWAPAN

Tuan Yang Di Pertua,

Perolehan kamera badan (*body worn camera*) bagi kegunaan anggota Polis Diraja Malaysia (PDRM) telah diluluskan oleh Kerajaan di bawah Rancangan Malaysia Kedua Belas (RMKe-12), *Rolling Plan 1*. Perolehan ini sedang dalam peringkat **memuktamadkan spesifikasi** dan akan dipelawa kepada semua pembekal yang layak secara tender terbuka melalui Sistem ePerolehan. Kos bagi perolehan ini dianggarkan berjumlah **RM30 juta**.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI MOHD REDZUAN BIN
MD YUSOF [ALOR GAJAH]**

TARIKH : 17 NOVEMBER 2021 (RABU)

SOALAN

DATUK SERI MOHD REDZUAN BIN MD YUSOF minta **MENTERI KESIHATAN** menyatakan secara terperinci jumlah pecahan perbelanjaan yang telah dibelanjakan bagi pengurusan pandemik COVID-19 termasuk perbelanjaan pengurusan pusat kuarantin, vaksin dan perbelanjaan-perbelanjaan yang berkaitan.

JAWAPAN

Tuan Yang di-Pertua,

1. Pada tahun 2021, Kementerian Kesihatan telah diluluskan peruntukan sejumlah **RM38.05 bilion**, iaitu sebanyak **RM27.22 bilion** disediakan di bawah Peruntukan Mengurus, **RM4.30 bilion** di bawah Peruntukan Pembangunan dan sebanyak **RM6.53 bilion** peruntukan khas bagi menangani pandemik COVID-19 termasuk perolehan vaksin dan lain-lain perbelanjaan bagi pelaksanaan Program Imunisasi COVID-19 Kebangsaan (PICK).
2. Di bawah peruntukan khas bagi menangani pandemik COVID-19, Kementerian Kesihatan telah membelanjakan sebanyak **RM4.77 bilion** bagi menampung pelbagai keperluan rawatan dan saringan COVID-19 serta PICK seperti emolumen pegawai kontrak, bayaran saguhati

sukarelawan kesihatan serta perkhidmatan penyumberluaran pesakit ke fasiliti swasta, sajian makanan, sampel ke makmal swasta, *home monitoring* pesakit COVID-19 dan imunisasi melibatkan pengamal perubatan swasta. Selain itu, perbelanjaan juga melibatkan pelbagai keperluan bekalan perubatan iaitu ubat, gas perubatan, vaksin, reagen, bekalan pakai habis (*consumables*) dan peralatan perlindungan diri (PPE) serta aset perubatan dan bukan perubatan. Peruntukan ini juga digunakan bagi pembayaran sebanyak **87.9 juta dos vaksin** yang telah ditempah oleh Kementerian Kesihatan melalui Fasiliti COVAX dan secara rundingan terus dengan beberapa pengeluar vaksin COVID-19.

3. Selain itu di bawah Peruntukan Pembangunan, sebanyak **RM408 juta** telah diperuntukkan dalam usaha menangani pandemik COVID-19 sepanjang tahun 2021. Daripada jumlah ini, sebanyak **RM66 juta** diperuntukkan bagi menaik taraf dan membaik pulih fasiliti kesihatan, termasuk menyediakan hospital medan dan wad bagi pesakit COVID-19. Selain itu, sebanyak **RM342 juta** pula telah diperuntukkan untuk pembelian peralatan perubatan dan bukan perubatan untuk merawat pesakit COVID-19.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB TUAN DR. MASZLEE B. MALIK
(SIMPANG RENGAM)**

TARIKH : 17 NOVEMBER 2021 (RABU)

SOALAN

DR. MASZLEE BIN MALIK [SIMPANG RENGAM] minta **MENTERI
DALAM NEGERI** menyatakan :-

(a) berapa banyak pendakwaan yang telah dibuat kepada Sindiket Kontraban, dan apakah barang-barang penyeludupan yang banyak dirampas; dan

(b) berapa kumpulan Sindiket Kontraban yang telah dikenal pasti di Semenanjung Malaysia, Sabah dan Sarawak. Nyatakan statistik sabitan Mahkamah serta jumlah barang rampasan dan adakah Sindiket Kontraban ini masih bermaharaja lela menjalankan perniagaan disebabkan terdapat unsur rasuah atau penguat kuasa takut kepada mereka .

SOALAN NO : 28**JAWAPAN**

Tuan Yang Di Pertua,

Status Kertas Siasatan Op Kontraban Bagi Tahun 2018 sehingga 2021 (Januari - September) adalah seperti berikut:

TAHUN	STATUS SIASATAN				JUMLAH KERTAS SIASATAN
	TUDUH	NFA	KUS	DALAM SIASATAN	
2018	168	70	13	28	279
2019	323	232	13	134	702
2020	591	429	56	296	1,372
2021 (JAN-SEPT)	81	24	17	954	1,076
JUMLAH	1,163	755	99	1,412	3,429

Manakala Statistik Jumlah Dan Jenis Rampasan Bagi Tahun 2018 Hingga 2021 (Januari - September) adalah seperti berikut:

JENIS BARANG	2018	2019	2020	2021 (JAN-SEPT)	JUMLAH KES
ROKOK	199	580	1,121	894	2,794
MINUMAN KERAS	76	151	330	307	864
MERCUN / BUNGA API	6	9	18	21	54
LAIN-LAIN BARANG	2	14	13	14	43
JUMLAH	283	754	1,482	1,236	3,755

SOALAN NO : 28

Jumlah Kumpulan Sindiket Kontraban Yang Telah Dikenal Pasti Di Semenanjung Malaysia adalah seperti berikut:

NEGERI	JUMLAH KUMPULAN SINDIKET
Johor	5
WP Kuala Lumpur & Selangor	9
Negeri Sembilan	0
Melaka	1
Perak	2
Kedah	0
Pulau Pinang	2
Perlis	0
Kelantan	3
Terengganu	2
Pahang	3
JUMLAH	27

**PEMBERITAHUAN PERTANYAAN DEWAN RAKYAT
MESYUARAT KEDUA PARLIMEN, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

**DARIPADA : DR. KELVIN YII LEE WUEN
[BANDAR KUCHING]**

TARIKH : 17 NOVEMBER 2021 (RABU)

SOALAN

DR. KELVIN YII LEE WUEN minta **MENTERI KESIHATAN** menyatakan status pembinaan Hospital Petra Jaya Sarawak dan Klinik Kesihatan Tabuan Jaya. Jangka masa siap, pelan terkini serta syarikat-syarikat yang terlibat. Apakah sebab projek tersebut ditangguhkan.

JAWAPAN

Tuan Yang di-Pertua,

1. Projek Hospital Petrajaya (300 katil) telah diluluskan oleh Unit Perancang Ekonomi, Jabatan Perdana Menteri (UPE, JPM) untuk dilaksanakan di bawah Rancangan Malaysia Kesepuluh (RMKe-10) pada tahun 2011. Projek ini dilaksanakan oleh Jabatan Kerja Raya Malaysia (JKR Malaysia) dengan Fasa Pembinaan bermula pada 30 Mei 2013 dan dijadualkan siap pada 30 Jun 2018. Walau bagaimanapun, berikutan prestasi kemajuan projek yang tidak memuaskan, JKR Malaysia telah menamatkan kontraktor Zecon Berhad pada 2 Ogos 2018. Projek Menyiapkan Baki Kerja Terbengkalai Hospital Petrajaya dilaksanakan secara Tender Terbuka oleh JKR Malaysia. Surat Setuju Terima (SST) telah dikeluarkan pada 30 Disember 2020 kepada Blackfox Engineering Sdn. Bhd. Sehingga kini, kemajuan sebenar projek adalah 5.02% dengan tarikh siap semasa pada bulan Januari 2024.

Tuan Yang di-Pertua,

2. Berhubung dengan status pembinaan Klinik Kesihatan Tabuan Jaya, Projek Klinik Kesihatan (Jenis 2) Tabuan Jaya, Kuching telah diluluskan oleh Unit Perancang Ekonomi, Jabatan Perdana Menteri (UPE, JPM) untuk dilaksanakan di bawah Rancangan Malaysia Kesebelas (RMKe-11) tahun 2016. Projek ini dilaksanakan di dalam dua (2) fasa:

- (i) Fasa pertama melibatkan kerja-kerja tanah, telah dimulakan pada 28 Mac 2017 dan siap sepenuhnya pada 28 Februari 2018. Fasa ini telah dilaksanakan oleh kontraktor Engsunai Enterprise Sdn. Bhd; dan
- (ii) Fasa kedua pula melibatkan kerja bangunan, telah dilaksanakan secara tender terbuka oleh JKR Sarawak. Projek ini telah ditender kali pertama pada 2 Februari 2019. Namun, pada 15 Januari 2020, Perbendaharaan Malaysia Sarawak melalui *Federal Central Tenders Board* (FCTB) telah memutuskan supaya projek ini ditender semula. Projek ini telah ditender semula pada 12 Februari 2021 dan telah dibentangkan di dalam FCTB pada 12 Ogos 2021.

3. JKR Sarawak telah mengemukakan permohonan turun kuasa dari Menteri Kerja Raya Malaysia kepada Pengarah JKR Sarawak bagi menandatangani Surat Setuju Terima (SST) melebihi RM5 juta pada 15 September 2021. SST akan dikeluarkan oleh JKR Sarawak kepada petender berjaya setelah permohonan Perwakilan Kuasa Menandatangani Kontrak diluluskan oleh Menteri Kerja Raya Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS, TAHUN 2021**

PERTANYAAN : JAWAB LISAN
DARIPADA : TUAN WONG HON WAI [BUKIT BENDERA]
TARIKH : 17 NOVEMBER 2021 (RABU)

SOALAN

TUAN WONG HON WAI [BUKIT BENDERA] minta **MENTERI SUMBER MANUSIA** menyatakan usaha pembaharuan undang-undang yang telah atau sedang diusahakan oleh pihak Kementerian Sumber Manusia sejak Mac 2020 dan bilakah pembaharuan tersebut akan dibentangkan di Parlimen.

JAWAPAN

Tuan Yang Di Pertua,

Sejak Mac 2020, Kementerian Sumber Manusia (KSM) telah melaksanakan pembaharuan terhadap beberapa undang-undang perburuhan bagi memastikan undang-undang tersebut dapat memenuhi keperluan semasa, khususnya isu-isu yang timbul setelah tercetusnya pandemik COVID-19.

Undang-undang yang sedang dipinda termasuk Akta Keselamatan dan Kesihatan Pekerjaan 1994 [*Akta 514*], Akta Kilang dan Jentera 1967 [*Akta 139*], Akta Kerja 1955 [*Akta 265*] dan Akta Kesatuan Sekerja 1959 [*Akta 262*].

Rang Undang-Undang (RUU) Keselamatan dan Kesihatan Pekerjaan (Pindaan) 2020 dan RUU Kilangan dan Jentera (Pemansuhan) 2020 telah diluluskan untuk bacaan kali ketiga Di Dewan Rakyat pada 27 Oktober 2021 dan dijangka akan dibentangkan di Dewan Negara pada Disember 2021.

Manakala RUU Kerja (Pindaan) 2021 pula telah dibentang di Dewan Rakyat untuk bacaan kali pertama pada 25 Oktober 2021 dan dijangka akan dibentang untuk bacaan kali kedua pada Disember 2021.

Bagi Akta Kesatuan Sekerja 1959 [*Akta 262*], draf pindaan sedang dalam semakan terakhir Jabatan Peguam Negara sebelum di bawa ke Parlimen untuk bacaan kali pertama.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS (2021)**

PERTANYAAN : LISAN

DARIPADA : TUAN CHANG LIH KANG (TANJONG MALIM)

TARIKH : 17 NOVEMBER 2021 (RABU)

SOALAN

TUAN CHANG LIH KANG minta **MENTERI PERUMAHAN DAN KERAJAAN TEMPATAN** menyatakan nilai rumah kediaman yang tidak terjual sehingga Jun 2021. Apakah sebab utama masalah ini.

JAWAPAN

Tuan Yang di-Pertua,

Saya mengucapkan terima kasih atas pertanyaan dan keprihatinan Ahli Yang Berhormat mengenai masalah lambakan rumah yang tidak terjual ini. Untuk makluman Ahli Yang Berhormat, isu lambakan rumah tidak terjual sememangnya memberi kesan ke atas pasaran hartanah serta pertumbuhan ekonomi negara. Bagi menangani isu ini, Kementerian Perumahan dan Kerajaan Tempatan (KPKT) telah dan sedang berusaha mencari jalan penyelesaian yang komprehensif dengan semua pemain industri perumahan.

Berdasarkan laporan Status Pasaran Harta Tanah oleh Pusat Maklumat Harta Tanah Negara (NAPIC), sehingga Jun 2021 terdapat 31,112 unit rumah siap dibina tidak terjual yang bernilai RM20.1 bilion. KPKT memandang serius mengenai isu rumah kediaman yang tidak terjual ini. Isu ini pernah dibincangkan dalam mesyuarat Majlis Tindakan Ekonomi (*Economic Action Council; EAC*) yang dipengerusikan oleh YAB Perdana Menteri pada 19 Ogos 2020. Antara punca lambakan rumah tidak terjual ini berlaku adalah ekoran daripada penawaran perumahan

yang tidak sepadan dengan permintaan di sesebuah lokaliti, harga rumah yang tidak sepadan dengan pendapatan isi rumah, lokasi yang kurang menarik dan lain-lain lagi.

Selain itu, isu lambakan rumah tidak terjual ini turut berpunca daripada pemaju perumahan yang tidak melaksanakan kajian kebolehpasaran (*feasibility study*) yang komprehensif bagi menentukan tahap kemampuan lokaliti, jenis rumah yang diminati serta lokasi yang sesuai. Lambakan rumah tidak terjual ini akan menyebabkan berlaku kelembapan pasaran hartanah yang memberi impak kepada ekosistem pemajuan perumahan serta menjejaskan rantai ekonomi secara keseluruhan. Pada masa yang sama, transaksi pembelian rumah sedia ada secara *subsale* juga menyumbang kepada peningkatan rumah baharu yang tidak terjual.

Antara langkah utama yang telah diambil bagi menangani masalah lambakan rumah tidak terjual adalah melalui Kempen Pemilikan Rumah (*Home Ownership Campaign; HOC*) di mana pengecualian duti setem diberikan kepada pembeli untuk pembelian rumah kediaman yang berharga antara RM300,000 hingga RM2.5 juta terhad kepada RM1 juta pertama daripada harga kediaman tersebut. Pemberian diskaun sebanyak 10% turut disediakan oleh pemaju yang menyertai kempen ini iaitu yang berdaftar melalui Persatuan Pemaju Hartanah dan Perumahan Malaysia (REHDA), Persatuan Pemaju Perumahan dan Hartanah Sabah (SHAREDADA) dan Persatuan Pemaju Perumahan dan Hartanah Sarawak (SHEDADA).

Kempen ini yang bermula sejak Januari 2019 akan diteruskan sehingga 31 Disember 2021. Walaupun HOC dilaksanakan, pasaran hartanah dijangka masih akan kekal perlahan sehingga akhir tahun 2021. Kadar pasaran hartanah ini bergantung kepada faktor domestik dan luaran seperti kenaikan harga bahan binaan, ketidaksepadanan penawaran dan permintaan (*supply and demand mismatch*), harga tanah yang melambung tinggi serta perkembangan pandemik COVID-19.

Kementerian juga bercadang untuk memperkenalkan peraturan/garis panduan kepada para pemaju perumahan untuk mengemukakan

kajian kebolehlaksanaan (*feasibility study*) semasa memohon Kebenaran Merancang (KM). Hasil kajian ini dapat membantu mengelak daripada berlakunya sebarang pembangunan perumahan yang tidak sesuai dengan permintaan pasaran dan akhirnya menyebabkan berlakunya masalah lebih rumah yang tidak terjual. Pada masa yang sama, Kementerian juga sedang membangunkan Indeks Daya Huni (*Livability Index*) yang akan menjadi satu panduan kepada PBT dalam memproses KM untuk pemajuan perumahan.

KPKT juga sedang menjalankan Kajian Analisis Data Raya (*Big Data Analytics*; BDA) Perumahan mulai Februari 2021 bagi mendapatkan gambaran sebenar kedudukan dan ketersediaan data berkaitan sektor perumahan di Malaysia. Hasil kajian analisis data ini akan digunakan untuk pembangunan sistem yang berkaitan. Kajian ini bertujuan untuk membantu mengatasi hartanah siap yang tidak terjual dan seterusnya berupaya mengetahui kedudukan pasaran perumahan hartanah dengan lebih jelas dan tepat demi pembangunan sektor hartanah yang lestari dan efisien.

Kajian ini turut dijadikan input bagi pembangunan platform pusat pengumpulan data hartanah yang meliputi permintaan dan penawaran. Pusat pengumpulan data hartanah seterusnya dapat membantu pihak Kerajaan dalam membuat keputusan di peringkat Persekutuan dan kerajaan negeri bagi penyediaan dasar dan perancangan perumahan negara secara lebih komprehensif.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

DARIPADA : YB TUAN SIM CHEE KEONG (BUKIT MERTA JAM)

TARIKH : 17 NOVEMBER 2021 (RABU)

SOALAN

TUAN SIM CHEE KEONG [BUKIT MERTA JAM] minta **MENTERI DALAM NEGERI** menyatakan tentang kartel polis seperti yang didakwa oleh bekas IGP Tan Sri Abdul Hamid Bador dan adakah sebarang siasatan dijalankan serta status isu ini.

JAWAPAN

Tuan Yang Di Pertua,

Kementerian sentiasa mengambil perhatian isu berkaitan integriti penjawat awam termasuk isu kartel polis. Berdasarkan siasatan yang dijalankan, tiada timbul sebarang isu kartel dalam kalangan Pegawai Kanan Polis Diraja Malaysia (PDRM) di semua peringkat. Kementerian amat yakin dengan kepimpinan PDRM yang membarisi benteng hadapan negara yang sentiasa ikhlas dalam menggalas setiap amanah yang diberikan dengan mengenyepikan kepentingan diri semata-mata. Inilah sebaik-baik pengorbanan yang dapat dihadihkan buat agama, bangsa, dan negara.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS (2021)**

PERTANYAAN : LISAN

**DARIPADA : TUAN PRABAKARAN A/L M
PARAMESWARAN (BATU)**

TARIKH : 11 NOVEMBER 2021 (KHAMIS)

SOALAN

TUAN PRABAKARAN A/L M PARAMESWARAN minta **MENTERI PERUMAHAN DAN KERAJAAN TEMPATAN** menyatakan adakah pembinaan rumah PPR ini benar-benar menempati keperluan B40 di setiap negeri, di mana pembinaan dibuat berdasarkan bilangan data isi rumah yang memerlukan rumah sewa PPR di setiap negeri, bekas Menteri KPKT mengumumkan pada Ogos 2021 bahawa sehingga Ogos 2021, KPKT akan membina 11 projek perumahan 4000 unit PPR diseluruh negara.

JAWAPAN

Tuan Yang di-Pertua,

Untuk makluman Ahli Yang Berhormat, objektif Program Perumahan Rakyat (PPR) adalah untuk membuat penempatan semula setinggan dan bagi memenuhi keperluan rumah untuk golongan berpendapatan rendah (B40). Penentuan kriteria perancangan dan pelaksanaan projek PPR ini adalah berdasarkan perbincangan bersama kerajaan negeri yang telah mengenal pasti kawasan tumpuan golongan B40, cadangan tapak yang disyorkan oleh kerajaan negeri serta permohonan PPR yang tinggi. Selain itu, kesesuaian tapak, keperluan setempat atau faktor demografi turut diambil kira selain aspek kemampuan kewangan Kerajaan.

Untuk makluman Ahli Yang Berhormat, pengumuman 11 projek sebanyak 4,120 unit dibuat berdasarkan perancangan separuh penggal kedua RMKe-11. Walau bagaimanapun, bagi RMKe-12 senarai projek-projek dalam perancangan yang telah dikemas kini dan mengambil kira semakan semula serta rasionalisasi ke atas perancangan PPR kepada 8 projek yang melibatkan 2,893 unit rumah bagi tahun 2021. Melalui semakan semula perancangan, Kerajaan akan lebih memfokuskan kepada kawasan yang benar-benar mempunyai permintaan PPR yang tinggi di samping lokasi yang strategik serta tapak yang sesuai untuk pembangunan perumahan PPR. Selain itu, Kerajaan juga dapat membantu golongan berpendapatan rendah untuk menduduki rumah yang lebih selesa dan selamat.

Sekiranya terdapat keperluan PPR di sesebuah lokasi, Ahli Yang Berhormat bagi kawasan terlibat boleh mencadangkan kepada kerajaan negeri. Seterusnya, kerajaan negeri akan selaraskan permohonan dengan pihak KPKT beserta tapak cadangan lokasi milik kerajaan negeri yang bersesuaian. KPKT akan mengemukakan permohonan peruntukan untuk pembinaan PPR tersebut kepada Unit Perancang Ekonomi (EPU) tertakluk kepada kesesuaian lokasi yang dicadangkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS, TAHUN 2021**

PERTANYAAN : JAWAB LISAN
DARIPADA : DATUK ROZMAN BIN ISLI [LABUAN]
TARIKH : 17 NOVEMBER 2021 (RABU)

SOALAN

DATUK ROZMAN BIN ISLI [LABUAN] minta **MENTERI SUMBER MANUSIA** menyatakan adakah kajian dibuat mengenai keberkesanan dasar bekerja dari rumah dan rancangan Kerajaan untuk memperluas dasar ini di seluruh negara pasca pandemik COVID-19.

JAWAPAN

Tuan Yang Di Pertua,

YAB Perdana Menteri pada 8 Mac 2021 bersempena Hari Wanita 2021 telah mengumumkan mengenai amalan **Bekerja Dari Rumah (BDR)** selepas pelaksanaan Perintah Kawalan Pergerakan (PKP). Pemakaian amalan BDR perlu diperluaskan ke atas semua sektor sebagai langkah menyediakan persekitaran kerja yang kondusif dan fleksibel, terutamanya bagi menyokong golongan wanita untuk bekerja dengan lebih produktif walaupun dalam keadaan mereka perlu melaksanakan tugas di rumah.

Kerajaan komited dalam membantu rakyat dan sekaligus mengembalikan persekitaran ekonomi kepada situasi ***“business as usual.”*** Perkara ini boleh direalisasikan dengan mengadaptasi norma baharu bagi memacu ekonomi negara ke tahap yang lebih tinggi. Selain pelbagai insentif yang telah disediakan oleh Kerajaan melalui lapan (8) pakej rangsangan ekonomi bagi mengatasi impak COVID-19, Kerajaan berpandangan bahawa **perluasan amalan Aturan Kerja Fleksibel** seperti BDR dapat membantu

aktiviti ekonomi diteruskan oleh syarikat di samping memberikan manfaat dalam aspek kebajikan pekerja terutamanya dalam tempoh PKP.

Kerajaan melalui TalentCorp telah melaksanakan program **Amalan Keseimbangan Kerja dan Kehidupan** (*Work Life Practices* atau *WLPs*) sejak tahun 2015. Program ini merangkumi pelbagai kemudahan bagi pihak pekerja seperti waktu kerja fleksibel, BDR, bekerja separuh masa (*part-time work*), pelanjutan cuti bersalin (*extended maternity leave*), pusat penjagaan kanak-kanak di pejabat, dan banyak lagi.

Dari tahun 2015 hingga 2019, lebih dari 200 syarikat telah mengamalkan Amalan Keseimbangan Kerja dan Kehidupan melalui peningkatan kesedaran dalam usaha menggalakkan syarikat-syarikat kecil dan sederhana mengamalkan keseimbangan kerja dan kehidupan.

Pada tahun 2017, satu kajian telah dilaksanakan ke atas 369 majikan terpilih dan mendapati bekerja dari rumah merupakan kaedah aturan kerja fleksibel yang tertinggi ditawarkan oleh majikan kepada golongan sasaran yang memerlukan. Menurut soal selidik dan laporan yang sama mendapati hanya 16% sahaja amalan BDR diamalkan oleh syarikat. Namun begitu, 83% majikan telah dan sedang mempertimbangkan BDR untuk menjadi dasar berterusan syarikat kerana majikan dan pekerja berpandangan kualiti kerja masih kekal meskipun bekerja dari rumah.

Selain itu, Amalan Keseimbangan Kerja dan Kehidupan diperkasakan dengan pewartaan **Akta Kaedah-Kaedah Cukai Pendapatan (Potongan bagi Kos Pelaksanaan Pengaturan Kerja Fleksibel) 2021** bertarikh **4 Oktober 2021**. Melalui warta tersebut, TalentCorp telah dimandatkan sebagai agensi yang akan memperakukan pelaksanaan pengaturan atau penambahbaikan pengaturan kerja fleksibel di syarikat-syarikat.

Rang Undang-Undang Kerja (Pindaan) 2021 telah dibentangkan di Dewan Rakyat pada 25 Oktober 2021. Terdapat cadangan untuk memasukkan Bahagian baharu (Bahagian baharu XIIC) berkaitan peruntukan Aturan Kerja Fleksibel yang mengandungi dua (2) seksyen, iaitu:

- (i) memperuntukkan pekerja untuk memohon kepada majikan bagi mengubah waktu kerja, hari kerja atau tempat kerja yang berkaitan

dengan pekerjaannya, dengan tertakluk kepada Bahagian XII Akta 265 (*Rest Days, Hours of Work, Holidays and Other Conditions of Service*) atau apa-apa yang terkandung dalam kontrak perkhidmatan; dan

- (ii) permohonan bagi aturan kerja secara fleksibel dengan mengemukakan permohonan kepada Ketua Pengarah JTKSM.

Dalam memastikan pihak majikan dan pekerja memahami pelaksanaan pengaturan kerja fleksibel, satu garis panduan telah dibangunkan yang terdiri daripada 12 *toolkits* bagi setiap kategori berbeza di bawah Aturan Kerja Fleksibel iaitu:

- (i) Bekerja Dari Rumah (Work From Home);
- (ii) Waktu Fleksi (Flexi Hours)
- (iii) Tugas Berkala (Seasonal Work);
- (iv) Perkongsian Kerja (Job Sharing);
- (v) Peranan Diubah (Modified Role);
- (vi) Persaraan Berfasa (Phased Retirement);
- (vii) Minggu Bekerja Dimampat (Compressed Work Week);
- (viii) Pulang Kerja Lebih Awal (Leaving Early from Work);
- (ix) Hari Pelepasan Pilihan Pekerja (Employee's Choice of Day-Off);
- (x) Pertukaran Shif (Shift Swapping);
- (xi) Waktu Kerja Berperingkat (Staggered Hours); dan
- (xii) Pengurangan Kerja (Reduced Work).

Garis panduan umum ini mengetengahkan faktor kritikal yang perlu diambil kira oleh majikan untuk membuat keputusan dalam melaksanakan Aturan Kerja Fleksibel termasuklah kesesuaian industri/sektor, jenis pekerjaan mahupun peringkat pekerjaan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

**DARIPADA : TUAN LARRY SOON @ LARRY SNG WEI
SHIEN [JULAU]**

TARIKH : 17 NOVEMBER 2021 (RABU)

SOALAN

TUAN LARRY SOON @ LARRY SNG WEI SHIEN [JULAU] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah kriteria dan syarat-syarat yang ditetapkan oleh pihak Kementerian untuk meluluskan permohonan lesen mengusahakan stesen minyak di kawasan luar bandar serta nyatakan dengan terperinci jumlah permohonan lesen yang telah diluluskan di kawasan Parlimen Julau.

JAWAPAN

Tuan Yang di-Pertua,

1. Untuk makluman Yang Berhormat, setiap permohonan untuk membangunkan stesen minyak perlu dihantar melalui syarikat minyak kepada Kementerian Perdagangan Dalam Negeri dan Hal Ehwal Pengguna. Ini adalah bagi memastikan pembekalan produk petroleum setiap stesen minyak disokong oleh syarikat minyak yang dipilih oleh pengusaha stesen minyak tersebut.
2. Antara syarat yang ditetapkan dalam mempertimbangkan permohonan membangunkan stesen minyak adalah lokasi stesen minyak perlu melebihi jarak 25km daripada sempadan negara. Dasar 25km ini ditetapkan bagi mengurangkan ketirisan produk petroleum bersubsidi ke negara luar.
3. Kelulusan Kementerian Perdagangan Dalam Negeri dan Hal Ehwal Pengguna untuk tapak membangunkan stesen minyak seterusnya akan dipanjangkan oleh pemohon kepada Pihak Berkuasa Tempatan (PBT) untuk kelulusan seperti Kebenaran Merancang (KM) dan Pelan Bangunan (PB). Selain PBT, syarikat minyak juga perlu mendapatkan kelulusan agensi Kerajaan lain yang berkaitan seperti Jabatan Bomba dan Penyelamat Malaysia bagi penilaian keselamatan tapak dan juga Lembaga Lebuhraya Malaysia (LLM) bagi cadangan tapak yang terletak di lebuhraya. Dengan kelulusan semua perkara berkaitan, pemohon akan mendapatkan Kebenaran PDA (Petroleum Development Act 1974) dan Lesen CSA (Control Supply Act 1961) daripada Kementerian Perdagangan Dalam Negeri dan Hal Ehwal Pengguna sebelum stesen minyak boleh beroperasi.

4. Proses dan syarat yang sama adalah terpakai kepada stesen minyak di bandar mahu pun di luar bandar. Syarat tambahan bagi kawasan luar bandar adalah permohonan baharu daripada syarikat minyak tidak boleh melibatkan cadangan tapak stesen minyak dengan lokasi 10km daripada stesen mini sedia ada. Stesen minyak mini iaitu di bawah IPTB Sdn. Bhd., Smart Stream Resources Sdn. Bhd. dan Petro Teguh Sdn. Bhd adalah merupakan stesen minyak dalam skala dan modal lebih kecil serta mendapat bekalan daripada syarikat minyak utama iaitu Petronas Dagangan Berhad dan Shell Malaysia Trading Sdn. Bhd. Dasar 10 km ini ditetapkan bagi memastikan pembekalan produk petroleum di kawasan luar bandar.

5. Untuk makluman Yang Berhormat, di kawasan Parlimen Julau setakat ini terdapat dua (2) stesen minyak yang telah Kementerian Perdagangan Dalam Negeri dan Hal Ehwal Pengguna luluskan tapaknya dan kini berada dalam proses pembangunan. Dua (2) stesen minyak ini adalah di bawah syarikat minyak Smart Stream Resources Sdn. Bhd. dan IPTB Sdn. Bhd.

6. Selain itu, terdapat 28 POS (*Point of Sale*) iaitu CD (*Community Drumming*) yang membekalkan bekalan produk petroleum kepada penduduk di kawasan Julau. CD (*Community Drumming*) ini merupakan usaha Kementerian Perdagangan Dalam Negeri dan Hal Ehwal Pengguna untuk memastikan bekalan yang mencukupi di kawasan Parlimen Julau secara khususnya dan di seluruh negara secara amnya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : PUAN ISNARAISAH MUNIRAH MAJILIS
[KOTA BELUD]**

TARIKH : 17 NOVEMBER 2021 (RABU)

SOALAN

PUAN ISNARAISAH MUNIRAH MAJILIS minta **MENTERI KESIHATAN** menyatakan rancangan untuk mendigitalkan rekod penderma darah di Sabah yang masih menggunakan sistem manual.

JAWAPAN

Tuan Yang di-Pertua,

1. Perkhidmatan Perubatan Transfusi Kebangsaan melalui Pusat Darah Negara dan Tabung-Tabung Darah di seluruh negara telah bekerjasama untuk membangunkan iBloodLinq, iaitu *Blood Bank Information System Versi 2* (BBISv2) sebagai sistem pengurusan maklumat yang lengkap dan bersepadu bagi perkhidmatan perubatan transfusi di Kementerian Kesihatan. Sistem BBISv2 yang komprehensif ini merangkumi semua proses kerja di perkhidmatan perubatan transfusi dan membolehkan pendigitalan maklumat dari pendermaan darah sehingga transfusi darah kepada pesakit.

2. Di Sabah, hospital-hospital utama yang telah menggunakan sistem ini termasuklah Hospital Queen Elizabeth II, Hospital Duchess of Kent, Sandakan dan Hospital Tawau mulai pada bulan September 2019. Sepanjang tahun 2020, sebanyak 39,341 data penderma darah telah direkodkan di dalam Sistem BBISv2, iaitu 57.3% dari keseluruhan 68,741 penderma di negeri Sabah.

3. Kementerian Kesihatan bercadang untuk memperluaskan penggunaan Sistem BBISv2 kepada semua hospital Kementerian Kesihatan yang mempunyai Tabung Darah melalui permohonan di dalam Rancangan Malaysia Kedua Belas (RMKe-12) dan ini termasuk Tabung-Tabung Darah lain di negeri Sabah yang masih belum mempunyai sistem tersebut.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

DARIPADA : YB PUAN TEO NIE CHING (KULAI)

TARIKH : 17 NOVEMBER 2021 (RABU)

SOALAN

PUAN TEO NIE CHING [KULAI] minta **MENTERI DALAM NEGERI** menyatakan apa mekanisme yang sedia untuk memastikan suami bukan warganegara yang telah bercerai dengan isteri warga Malaysia, yang mempunyai hak penjagaan anak-anak serta dipertanggungjawab menjaga anak bersama, untuk terus menetap di Malaysia.

JAWAPAN

Tuan Yang Di Pertua,

Untuk makluman Ahli Yang Berhormat, Jabatan Imigresen Malaysia tidak mengeluarkan sebarang pas yang setaraf dengan Pas Lawatan Sosial Jangka Panjang Kategori Janda kepada lelaki warga asing yang telah bercerai dengan warganegara Malaysia.

Sehubungan itu, pertimbangan terhadap lelaki warga asing yang telah bercerai dengan warganegara Malaysia untuk berada di Malaysia adalah tertakluk kepada kebenaran oleh Jabatan Imigresen Malaysia.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS (2021)**

PERTANYAAN : LISAN

DARIPADA : TUAN WONG TACK (BENTONG)

TARIKH JAWAB : 17 NOVEMBER 2021 (RABU)

SOALAN

TUAN WONG TACK minta **MENTERI PERUMAHAN DAN KERAJAAN TEMPATAN** menyatakan apakah langkah-langkah yang akan diambil untuk menambah baik perkhidmatan kecemasan seperti bomba di kawasan-kawasan kampung atau pedalaman khususnya di Bentong.

JAWAPAN

Tuan Yang di-Pertua,

Kementerian Perumahan dan Kerajaan Tempatan (KPKT) melalui Jabatan Bomba dan Penyelamat Malaysia (JBPM) sentiasa peka terhadap keperluan khidmat kebombaan terutamanya melibatkan kawasan-kawasan yang jauh daripada balai bomba atau di pedalaman.

Pada masa ini, kawasan daerah Bentong mendapat khidmat kebombaan daripada Balai Bomba dan Penyelamat (BBP) Bentong yang merupakan balai bomba kategori B. BBP Bentong ini memiliki keanggotaan seramai 46 orang dan dilengkapi dengan 2 buah *Fire Rescue Tender* (FRT), sebuah *Light Fire Rescue Tender* (LFRT), sebuah jentera *Emergency Medical Rescue Services* (EMRS) serta 3 buah *Rapid Intervention Motorcycle* (RIM).

Sehingga kini, di daerah Bentong sahaja terdapat sebanyak empat (4) Pasukan Bomba Sukarela (PBS) yang telah ditubuhkan bermula pada tahun 2003 sehingga 2008 seperti berikut:

- i. PBS Perting;
- ii. PBS Manchis;
- iii. PBS Simpang Pelangai; dan
- iv. PBS Janda Baik

PBS ini bertindak sebagai pasukan tindak balas awal kecemasan (*first responder*) dalam memberi bantuan awal pemadaman kebakaran sebelum ketibaan pasukan bomba daripada balai yang berhampiran. Kesemua PBS ini telah dibekalkan dengan kenderaan bomba sukarela, kelengkapan peralatan perlindungan diri (PPE) dan peralatan asas pemadaman kebakaran oleh JBPM negeri Pahang.

Selain daripada itu, Kementerian melalui JBPM juga sedang dalam proses perolehan bagi membina sebuah balai bomba kategori D di kawasan Gohtong Jaya. BBP baharu ini dijangka dibina pada tahun 2022 dan akan siap serta beroperasi sepenuhnya pada tahun 2025. Dengan pembinaan BBP baharu ini, ia dapat memperluaskan capaian perkhidmatan kebombaan sekali gus membantu meningkatkan masa tindak balas (*response time*) jabatan di daerah Bentong.

Untuk makluman Ahli Yang Berhormat juga, Kementerian melalui JBPM telah mengambil pelbagai inisiatif dan pendekatan dalam memastikan komuniti setempat menjadi sebahagian daripada pasukan bertindak kecemasan. Justeru, antara program yang telah dan akan dilaksanakan adalah seperti berikut:

- i. meningkatkan penubuhan **Pasukan Bomba Sukarela (PBS)** di kawasan luar bandar atau pedalaman di daerah Bentong;
- ii. memperkasakan penubuhan **Bomba Komuniti** yang kini terdapat **satu (1) pasukan** di kawasan Bentong dan mereka ini akan diberi kefahaman tentang pencegahan kebakaran, latihan kebombaan dan penyediaan peralatan asas kawalan awal kebakaran seperti alat pemadam api; dan
- iii. melaksanakan dan mempertingkatkan kempen kesedaran keselamatan kebakaran termasuk Program 1 Rumah Satu Alat Pemadam Api (**1RAPI**), Program Sedia Urus Isi Rumah (**SURI**) dan penyediaan alat pengesan asap serta gas (**MyAlert**).

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN M. KULASEGARAN
[IPOH BARAT]**

TARIKH : 17 NOVEMBER 2021 (RABU)

SOALAN

TUAN M. KULASEGARAN minta **MENTERI KESIHATAN** menyatakan langkah-langkah yang akan diambil oleh Kementerian untuk mengurangkan masalah tumbesaran terbantut di mana Laporan Pertubuhan Kesihatan Dunia (WHO) melaporkan bahawa 17.7 peratus kanak-kanak dan remaja yang berusia 5 tahun hingga 19 tahun mengalami masalah pertumbuhan terbantut manakala Tabung Kanak-Kanak Pertubuhan Bangsa-Bangsa Bersatu (Unicef) melaporkan bahawa 23 % kanak-kanak miskin bandar juga mengalami masalah tumbesaran terbantut.

JAWAPAN

Tuan Yang di-Pertua,

1. Dalam usaha Kerajaan untuk mengurangkan masalah bantut dalam kalangan kanak-kanak, Program Menangani Masalah Bantut telah dilaksanakan dengan mensasarkan mereka yang berada di dalam 1,000 hari pertama kehidupan, iaitu ibu yang mengandung sehingga kanak-kanak berumur 2 tahun. Strategi program ini adalah berbentuk *public awareness* dan *capacity building* yang dilaksanakan melalui empat pendekatan iaitu komuniti, media, taman asuhan kanak-kanak (TASKA) serta klinik kesihatan.

2. Program Memerangi Masalah Bantut telah dilaksanakan dengan pelbagai aktiviti berbentuk kesedaran dan pengetahuan awam serta libat urus pelbagai agensi mengenai isu bantut dalam kalangan kanak-kanak. Pelbagai program bersama masyarakat, penyediaan bahan media #anakmalaysiasihat, sesi latihan dan dialog interaktif bersama pengasuh dan ibu bapa yang menghantar anak ke TASKA kerajaan serta latihan pengukuhan kompetensi pertumbuhan dan pemakanan kanak-kanak dalam kalangan anggota kesihatan di klinik telah dilaksanakan.

3. Kementerian Kesihatan sentiasa berusaha mengesan kanak-kanak yang berisiko dan mengalami masalah kekurangan zat makanan termasuklah bantut. Ibu bapa yang mempunyai anak bawah 5 tahun perlu hadir ke klinik untuk pengukuran berat dan tinggi bagi mengetahui status pemakanan mereka. Di klinik kesihatan kerajaan, perkhidmatan ini diberi secara percuma, di mana sekiranya anak tersebut dikesan mengalami masalah pemakanan, mereka akan dipantau dan dinilai secara bulanan oleh anggota kesihatan. Selain itu, pendidikan berkaitan penjagaan kesihatan, pemakanan dan kebersihan diri serta persekitaran turut diberi penekanan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS, TAHUN 2021**

PERTANYAAN : JAWAB LISAN

**DARIPADA : PUAN NURUL IZZAH BINTI ANWAR
[PERMATANG PAUH]**

TARIKH : 17 NOVEMBER 2021 (RABU)

SOALAN

PUAN NURUL IZZAH BINTI ANWAR [PERMATANG PAUH] minta
MENTERI SUMBER MANUSIA menyatakan :-

- (a) status terkini kajian Perintah Gaji Minimum oleh Jawatankuasa Teknikal Perundingan Gaji Negara; dan
- (b) usaha mengurangkan jurang pendapatan antara majikan dan pekerja memandangkan kajian Small Business UK 2019 mendapati CEO-CEO Malaysia dibayar 148 kali ganda lebih tinggi berbanding pekerja biasa.

JAWAPAN

Tuan Yang di-Pertua,

Akta Majlis Perundingan Gaji Negara 2011 [Akta 732] memperuntukkan perintah gaji minimum (PGM) hendaklah dikaji semula sekurang-kurangnya sekali setiap dua tahun. PGM 2020 dikuatkuasakan mulai Februari 2020, maka kajian semula perlu dilaksanakan dalam tempoh dua tahun daripada tarikh kuatkuasa perintah tersebut. Kajian ini penting untuk melihat implikasi dan hala tuju dasar gaji minimum. Input dari hasil kajian ini juga akan dijadikan asas kepada Kerajaan untuk membuat keputusan.

Buat masa ini, Jawatankuasa Teknikal Perundingan Gaji Negara (JTPGN) sedang meneliti data-data ekonomi dan sosio-ekonomi semasa yang berkaitan serta menjalankan rundingan dengan pihak majikan, persatuan majikan, pekerja dan kesatuan sekerja sebelum satu syor gaji minimum dikemukakan kepada Majlis Perundingan Gaji Negara (MPGN) untuk pertimbangan. Keputusan akhir mengenai gaji minimum akan dibuat oleh Kerajaan setelah menimbang syor yang dikemukakan oleh MPGN.

Pertimbangan Kerajaan dalam penetapan kadar gaji minimum dibuat berdasarkan *balanced approach*, iaitu mengambilkira pandangan pelbagai pihak sama ada pekerja, majikan dan Kerajaan. Keutamaan Kerajaan adalah menjamin kestabilan ekonomi negara dengan menjaga kepentingan semua pihak termasuk majikan dan pekerja.

Negara sedang dalam fasa pemulihan ekonomi kesan daripada pandemik COVID-19. Oleh yang demikian, kenaikan kadar gaji minimum perlu dilaksanakan secara berperingkat dengan nilai yang munasabah bagi memastikan pihak majikan mampu melaksanakan kadar gaji minimum yang baharu dan pekerja dapat mengekalkan pekerjaan. Selain itu, peningkatan kadar gaji minimum yang terlalu tinggi dan drastik boleh membebankan Perusahaan Mikro Kecil Sederhana (PMKS) membayar gaji pekerja, menjejaskan daya saing negara, menyebabkan pasaran buruh negara akan berdepan dengan cabaran untuk mencipta pekerjaan baharu yang berkualiti dan berkemahiran tinggi.

Dasar gaji minimum hanya salah satu dasar Kerajaan yang bertujuan membantu rakyat untuk meningkatkan pendapatan serta menampung keperluan asas. Dasar ini perlu dibantu oleh dasar-dasar Kerajaan lain yang boleh menjana peluang pekerjaan berkemahiran, peningkatan produktiviti dan pendapatan pekerja yang setimpal. Kombinasi dasar-dasar yang diperkenalkan Kerajaan diharap dapat memastikan negara kekal produktif, berdaya saing dan perkembangan ekonomi yang mampan.

Tuan Yang DiPertua,

Berdasarkan maklumat yang diperolehi daripada Unit Perancang Ekonomi (EPU), dalam tempoh Rancangan Malaysia Kedua Belas (RMKe-12), langkah bagi meningkatkan kesaksamaan bahagian pampasan

pekerja (CE) akan dilaksanakan dalam usaha untuk meningkatkan gaji pekerja.

Isu jurang pendapatan antara majikan dan pekerja yang besar akan diberi perhatian dalam RMKe-12 melalui inisiatif berikut:

- (i) Membangunkan garis panduan berdasarkan amalan terbaik firma *high road*. Langkah ini adalah bertujuan untuk meningkatkan CE. Firma *high road* adalah syarikat yang menitikberatkan kesejahteraan pekerja dalam menjalankan perniagaan termasuklah menekankan kepada perbezaan gaji yang kecil antara pelbagai peringkat pekerja;
- (ii) Meningkatkan keahlian dalam kesatuan sekerja;
- (iii) Memperkenalkan kaedah penetapan bersama (*co-determination*) yang membolehkan wakil pekerja turut terlibat pada peringkat membuat keputusan. Perkara ini dijangka akan dapat meningkatkan kelebihan kepada pekerja dalam proses rundingan bersama (*collective bargaining*) termasuk penetapan gaji yang lebih adil; dan
- (iv) Memperluas skop Indeks Gaji Kebangsaan (NWI) untuk meliputi kelayakan akademik, pengalaman kerja, kemahiran serta faktor lain yang menyumbang kepada perbezaan gaji. NWI akan ditambah baik dengan mengambil kira data pentadbiran bagi mengenal pasti kedinamikan upah berasaskan masa nyata. NWI yang merupakan panduan dan penanda aras kepada majikan dalam menentukan tahap gaji yang sesuai, selaras dengan tahap kelayakan dan kemahiran pekerja telah dibangunkan dengan menggabungkan data upah daripada pelbagai sumber.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

DARIPADA : DATUK DR. HASAN BIN BAHROM [TAMPIN]

TARIKH : 17 NOVEMBER 2021 (RABU)

SOALAN

DATUK DR. HASAN BIN BAHROM minta **MENTERI PEMBANGUNAN LUAR BANDAR** menyatakan apakah inisiatif kerajaan bagi memastikan migrasi belia luar bandar ke bandar dikurangkan dan bagaimanakah inisiatif tersebut menjamin belia tidak migrasi ke bandar.

JAWAPAN

Tuan Yang di-Pertua,

Untuk makluman Yang Berhormat, pemerkasaan belia luar bandar merupakan antara agenda penting di bawah Dasar Pembangunan Luar Bandar. Belia dikenalpasti sebagai antara elemen penting untuk merealisasikan wawasan luar bandar sejahtera.

Sehubungan itu, tumpuan bukan sahaja diberikan untuk melengkapkan infrastuktur asas di kawasan luar bandar, tetapi juga mewujudkan persekitaran yang kondusif untuk pelaburan, pembangunan aktiviti ekonomi dan sosial ke arah menjadikan luar bandar kawasan yang ideal untuk didiami oleh golongan belia dan mengurangkan migrasi dari luar bandar ke bandar.

Antara program yang dilaksanakan kementerian bagi mencapai objektif ini adalah:

- i. Program Peningkatan Pendapatan (PPP) iaitu program pemberian bantuan peralatan serta latihan kepada kumpulan B40 di luar bandar bagi meningkatkan pendapatan semasa dan seterusnya keluar daripada zon kemiskinan. Fokus pelaksanaan program adalah kepada projek yang mempunyai elemen mentor mentee. Ia adalah untuk memastikan peserta mendapat bimbingan dan sentiasa dipantau supaya bantuan projek dapat menghasilkan peningkatan pendapatan dan konsisten;
- ii. Skim Pembiayaan Ekonomi Desa (SPED) merupakan skim pembiayaan untuk pembelian aset/ mesin/ peralatan, modal kerja untuk tujuan perolehan bahan mentah/ stok dan pengubahsuaian atau menaiktaraf premis perniagaan;
- iii. Program Latihan Kemahiran dan Kerjaya (PLKK) dilaksanakan oleh agensi-agensi di bawah KPLB iaitu GIATMARA, FELCRA, JAKOA, KEDA, KEJORA, KESEDAR dan KETENGAH. Pelaksanaan kursus adalah meliputi kursus jangka pendek, sederhana dan panjang. Selain dilaksanakan dengan kerjasama di antara agensi-agensi di bawah kementerian, program ini juga melibatkan syarikat pengendali latihan kemahiran swasta.

Selain itu, di antara inisiatif KPLB dalam mengatasi masalah migrasi belia luar bandar adalah dengan melaksanakan program TVET di bawah KPLB (TVET@KPLB) di seluruh negara bagi menjadikan TVET sebagai pilihan utama belia luar bandar. Program TVET@KPLB ini dilaksanakan melibatkan tujuh (7) agensi di bawah KPLB iaitu Jabatan Kemajuan Masyarakat (KEMAS), Jabatan Kemajuan Orang Asli (JAKOA), Majlis Amanah Rakyat (MARA), Lembaga Kemajuan Wilayah Kedah (KEDA), Lembaga Kemajuan Wilayah Pulau Pinang (PERDA), Lembaga Kemajuan Terengganu Tengah (KETENGAH) dan Pihak Berkuasa Kemajuan Pekebun Kecil Perusahaan Getah (RISDA).

Sehingga kini, terdapat sebanyak 279 buah institusi TVET@KPLB yang menawarkan 518 program TVET di pelbagai peringkat pengajian yang melibatkan seramai 48,558 orang pelajar di seluruh negara khususnya belia dan pelajar luar bandar.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

DARIPADA : YB PUAN WONG SHU QI (KLUANG)

TARIKH : 17 NOVEMBER 2021 (RABU)

SOALAN

PUAN WONG SHU QI [KLUANG] minta MENTERI DALAM NEGERI menyatakan Program Identiti Digital Nasional seperti berikut:

- (a) Keperluan program dan jenis perlindungan undang-undang bagi pengguna sekiranya berlaku penyalahgunaan atau kebocoran data memandangkan Kerajaan Negeri dan Persekutuan dikecualikan daripada Akta Perlindungan Data Peribadi 2010; dan
- (b) Batasan-batasan yang akan dilaksanakan dari segi penggunaan dan skop data yang diperoleh

JAWAPAN

Tuan Yang Di Pertua,

Untuk makluman Ahli Yang Berhormat, Identiti Digital Nasional (IDN) merupakan antara inisiatif penting dalam usaha Kerajaan untuk memenuhi agenda transformasi digital negara. Ia adalah suatu platform pengenalan dan pengesahan yang dipercayai (*'Verifiable Platform of Trust'*) yang boleh dimanfaatkan oleh individu, sektor awam dan swasta untuk pengenalan dan pengesahan identiti pengguna secara digital semasa berurusan secara dalam talian melalui penggunaan teknologi biometrik terkini. Walau bagaimanapun, IDN tidak akan menggantikan penggunaan dan fungsi Kad

Pengenalan (MyKad) sebaliknya berfungsi memperkukuhkan keselamatan MyKad sedia ada daripada sebarang pemalsuan.

Oleh kerana IDN merupakan satu inisiatif baharu Kerajaan, satu Majlis Identiti Digital Nasional dan beberapa jawatankuasa telah dibentuk bagi tujuan merangka pelaksanaan IDN iaitu Jawatankuasa Pemandu, Jawatankuasa Teknikal, Jawatankuasa Kerja Dasar dan Strategik serta Jawatankuasa Kerja Infrastruktur ICT. Jawatankuasa ini akan mengkaji, merangka dan membangunkan dasar, strategi dan infrastruktur ICT yang menyeluruh bagi melancarkan pelaksanaan IDN. Jawatankuasa ini juga akan melapor dan dipantau oleh Majlis Identiti Digital Nasional yang dipengerusikan oleh YB Menteri Dalam Negeri.

Proses perancangan dan pelaksanaan IDN bermula pada tahun ini dan dijangka dilaksanakan sepenuhnya pada tahun 2024. Pada masa ini, Jawatankuasa yang ditubuhkan **sedang memperhalusi akta-akta, peraturan dan arahan yang berkaitan** selaras dengan pelaksanaan IDN bagi memastikan data pengguna adalah selamat dan dilindungi sekiranya dikenalpasti berlakunya penyalahgunaan atau kebocoran data oleh mana-mana pihak.

Jawatankuasa ini juga **sedang mengkaji, merangka dan memperincikan penggunaan IDN dan juga skop data** yang akan terlibat agar dapat memenuhi objektif pelaksanaan untuk meningkatkan keselamatan, menambahbaik penyampaian perkhidmatan dan lebih memudahkan rakyat dalam mendapatkan mana-mana perkhidmatan secara digital.